

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY
NOV 1 6 1941

T9299/8125(12)

列國譜系門八

十二

古國篇一

伏羲後國章

神農後國章

列國譜系門九

古國篇二

黃帝後國章

列國譜系門十

古國篇三

少昊後國章

學海君道部世系頁

學海君道部卷之二十七

世系類

二十一
七

列國譜系

八

古國篇

一

卮言曰古之王天下者其支庶未嘗不裂土而封之非有大故不輕紕滅焉卽易姓受命之主更追崇先代之後不特弗殄其世也殷周以征誅得天下且爾前此可知矣以故姬姜姚姒之邦布列方寓春秋以往歷歷可考今據路史所紀國名凡帝王之後者刪其重複增其闕略爲古國篇而其世代疑似衆說不一者更系後篇

伏羲後國章

哈佛大學漢和
圖書館珍藏印

風

元和郡國志曰復州竟陵縣城本古風城古之風國即伏羲風姓也南臨汭水澁水也武德中置汭川縣

路史曰風帝太昊之後國後有風后佐黃帝滅蚩尤堯誅大風禹訪風后皆其祚云

竹書夏紀帝相二年征風及黃夷

陳

路史曰帝太昊都宛丘故陳為太昊之墟

包

路史曰包帝太昊之潛邦夏復封之為妣姓地在襄陽杜預世族譜有庖國云夏同姓王符云夏封伏羲之後

密

路史曰密太昊後國地在高密春秋之萊夷維邑也

今山東膠州高密縣

處

路史曰處世咸作密亦作宓故處子賤碑以為處義之後音為伏鄆之東一亭有致密鄉記為古密或者其處也

義

庖言曰書堯典乃命羲和疑義為伏羲之後

任

路史曰任本已姓逮黃帝以封幼子周之繼絕也以居風姓今濟陽之任城或曰仍也故晉志以仍與有仍為二

庖言曰孟子之鄒季任為任處守以幣交則戰國之時任國猶在

也今山東濟寧州有任城

宿

春秋隱公元年秋九月及宋人盟於宿

胡傳內稱及外稱人皆微者其地以國宿亦與焉微者盟會不志於春秋此其志者有宿國之君也

廬陵李氏曰地以國者宿鄧曹齊邢宋之盟是也若穀以宿爲邑名非矣

隱公八年夏六月辛亥宿男卒

穀梁傳宿微國也未能同盟故男卒也

一宿與魯已通而不名者舊史失之

又莊公十年春三月宋人遷宿

穀梁傳遷亾辭也其不地宿不復見也遷者猶未失其國家以徃者也

公羊傳遷之者何不通也以地還之也子沈子曰不通者蓋因而臣之也

高氏曰宿介於宋魯之間屬於宋而遷魯宋人以爲貳於魯而遷之遷者移入封內以爲封庸自是宿不復見則宿亦亾矣

廬陵李氏曰三傳左氏穀梁同公羊因而臣之之說亦是而不通之詞迂僻無義故不取穀梁未失其國家以徃本言自遷者注說得之而許氏因其說又曰遷之使未失其國以徃其義猶有所難則見王澤之未竭也僖文以後有滅國無遷國矣

路史曰宿風姓國武王所封宋人遷之杜預云東平亾鹽有故宿

城在鄆之須城東隋宿城縣也秦置須昌在須句城北隋改宿城
又於宿城西北別置須昌

卮言曰一統志今南直隸宿州古宿國

須句

春秋僖公二十年冬公伐邾二十二年春公伐邾取須句

左傳任宿須句顓頊風姓也於濟上寔司太昊與有濟之祀
以服事諸夏二十年邾人滅須句須句子來奔因成風也成風
爲之言僖公曰崇明祀保小寡周禮也蠻夷猶夏周禍也若封
須句是崇暉濟而脩祀紓禍也二十二年伐邾取須句及其君
焉禮也

胡傳按左氏云云固得崇祀保小之禮何以書取乎不請於王
命而專爲母家報怨擅取人國而及其君是以亂易亂非所以
爲禮也與收奪者無異

路史曰須句僖公母成風國也一作胸地志胸城在壽昌西北
今須城西北須胸故城者京相璠云須胸一國二城兩名非也
蓋鄆歸須城而胸猶是故所

羅氏論曰嗚呼以成風一婦人不出戶庭猶存繼絕之心豈惟
先王之澤哉蓋人情所同然者不可易也且伏羲去周幾年矣
而猶國焉欲世之不厚不可得矣

陳氏曰春秋嚴義利之辨苟以爲利一以取書之是故邾滅須
句須句子來奔伐邾取須句及其君焉書取須句莒不撫鄆鄆
叛而來書取鄆

廬陵李氏曰取須句之事恐諸家信左氏太過須句子既來奔魯史何得不書滅邾故劉氏以爲無此年滅須句及來奔事亦無反其君事直是須句久爲邾滅取其國爲邑魯人往伐取無他也

卮言曰按一統志今山東樂平州有須城

鄆

杜氏曰城陽姑幕縣南有員亭員卽鄆也

路史曰鄆風姓一曰員按太康地記有東西二鄆西鄆魯公所居今濟之鄆城舊云莒附庸以昭公元年傳言季武子伐莒取鄆誤之經二十五年齊人取鄆而居昭公不附莒也莒何得附庸東鄆卽須城文公十二年城鄆與成公九年楚人入鄆一曰員在今沂州沂水有員亭卽鄆亭寰宇以此爲莒魯所爭亦非

廬陵李氏曰文十二年城鄆成公九年楚人入鄆襄十一年季孫宿入鄆至昭元年取鄆二十五年齊侯取鄆以居公二十九年鄆潰此東鄆也其成四年城鄆乃西鄆也

顓頊

論語季氏將伐顓頊冉有季路問於孔子子曰求亾乃爾是過歟夫顓頊昔者先王以爲東蒙主且在邦域之中矣是社稷之臣也何以伐爲冉有曰今夫顓頊固而近於費今不取後世必爲子孫憂子曰丘也聞有國有家者不患寡而患不均不患貧而患不安羅氏論曰列土分茅自有民始矣秦失其猷而後世弗復知封建之有大便於君民也季氏將伐顓頊孔子責冉求曰國家不

死國記系 卷八 五
患寡貧患不均安讀至此泫然曰帝王之後世祚衍天下至數
千百年澤未艾也而魯一顛項冉氏不能容之顧不謂大哀乎
嗟乎號之不愛則其於虞也何有聖人之見豈同俗所知哉社
稷之臣山川之神主也亾故而伐之且猶不可況易之乎先王
盛時諸父諸舅星分棋布於神州之內原原而來接之以禮是
故秉旄奉幣夾輔尊獎不啻子弟之衛父兄手足之捍頭目者
惟是周旋揖異豈不休哉

卮言曰一統志云今山東費縣有顛項故城

巴

山海經曰西南有巴國太皞生咸鳥咸鳥生乘釐乘釐生後照後
照是始爲巴人

路史曰伏羲生咸鳥咸鳥生乘釐是司水土生后炤后炤生禰
降處于巴是生巴人所謂巴賔豈濮者今巴縣是後武王封宗姬
支庶于巴曰巴子其後僭號秦惠虜之

閬

路史曰閬通皆巴之邑郡

黔

路史曰巴滅巴子五季流於黔而君之生黑穴四姓

樊曄相鄭

酉 辰 巫 武 沅

世本曰巴郡南郡蠻本有五姓

路史曰酉辰巫武沅五州皆巴後分王黔中

廩

路史曰赤狄巴氏臣服四姓居夷城爲廩君世尙秦女

郝

路史曰太昊之弟郝骨氏爲帝立制其裔孫子期帝乙封之太原之郝今太原有郝鄉一云右扶風蓋屋鄉也帝乙時有子期因封之曰郝云

神農後國章

伊

路史曰伊炎帝本國堯之母家伊侯國後有伊尹洛之伊陽縣有伊水

者

尚書曰伯既戡黎祖伊恐奔告於王

羅氏曰自伊徙者故曰伊者猶陶唐殷商然一曰隹黎也故大傳作西伯戡者史記言文王伐隹音祈或以爲黎也一曰飢字書惟訛

厲

春秋僖公十五年齊師曹師伐厲

杜氏曰厲楚與國在義陽隋縣北有厲鄉

張氏曰兵法攻所必救厲在徐楚之間齊伐厲欲楚之必救以解徐也然後此楚敗徐於婁林則厲在所不必救明年不克救徐而還况同盟不同心而宋已伐曹矣

路史曰厲炎帝潛邦一曰列通爲賴然厲賴異

卮言曰按志今湖廣隋州有厲鄉

封

通典曰封丘古封國也地在開封

路史曰炎帝器生鉅爲黃帝師胙土命氏而爲封鉅夏有封父封文侯至周失國今開封有封父亭封丘臺卽封父國

逢

路史曰炎帝器生鉅及伯陵伯陵爲黃帝臣封於逢穆天子傳逢公其後也今開封蓬池一曰逢澤竹書紀年梁惠王發逢忌之藪以賜民者字當音麗

竹書周穆王十二年毛公班逢公固帥師從王伐犬戎

穆天子傳天子西征入於曹忽之人獻食馬糝米天子使逢固受之

又曰天子筮獵萃澤其封遇訟逢公占之曰訟之繇藪澤蒼蒼其中宜其正公戎事則從祭祀則熹田獵則獲天子飲逢公酒賜之駿馬十六締紵三十篋逢公再拜稽首

北齊

周語伶州鳩曰我姬氏出自天鼃及析木者有建星及牽牛焉則我皇妣太姜之姪伯陵之後逢公之所馮神也

註曰天鼃齊之分野也析木日辰所在也建星在牽牛間謂從辰星所在天鼃之首至析木之分歷建及牽牛皆水宿言得水類也太姜太王之妃伯陵太姜之祖逢伯陵也逢公伯陵之後爲殷諸侯封於齊地屬天鼃故祀天鼃祀而配食爲其神主馮依也

列國詩經 卷八
路史曰伯陵太姜之祖逢公伯陵之後為商侯伯自逢改封於齊地故山海經有北齊之國姜姓是知伯陵是也故周語云天鼃之分伯陵之後逢公之所憑神而說者謂為夏諸侯非也蓋因晏子序爽鳩在其前耳太常禮書以伯陵為伏羲孫高禰碑以為顓帝之苗俱失之矣

爰

山海經曰炎帝之孫伯陵同吳權之妻阿女緣婦緣婦孕三年是

生鼓延爰始為鍾

路史伯陵生三子曰爰曰鼓曰延爰戕臣堯傳作朱戕

路史曰爰戕國齊地一曰冒澤即朱故亦作朱戕

書舜典帝曰垂汝共工垂拜稽首讓於爰斯賢伯與

呂

國語太子晉曰共工從孫四岳佐禹帝昨四岳國命為侯伯賜姓

曰姜氏曰有呂謂其能為禹股肱心膂以養物豐民人也

韋注曰堯以四岳佐禹有功封於呂呂之為言齊也

史記齊世家曰四岳佐禹平水土有功虞夏之際封於呂或封於

申

竹書穆王五十一年作呂刑命甫侯於豐

書呂刑曰惟呂命王享國百年耄荒度作刑以詰四方

集傳呂侯為天子司寇穆王命訓刑以詰四方史錄為篇

唐孔氏曰書傳引此篇語多稱甫刑者呂侯子孫後改封甫如

詩之生甫及申不與我戍甫穆王時未有甫名後人以子孫國

號名之追稱甫刑若叔虞封唐子孫封晉而史記作晉世家亦

如荆楚殷商其實一也

詩大雅曰崧高維岳駿極於天維嶽降神生甫及申

集註甫甫侯也即穆王時作甫侯者或曰此是宣王時人而作

呂刑者之子孫也

東萊呂氏曰甫申意者皆先王時賢也甫侯同有功於民乃遠取

甫侯殆非也

詩王風揚之水曰揚之水不流束楚彼其之子不與我戍甫

集註甫即呂也書呂刑禮記作甫刑孔氏以呂侯後為甫侯是

也當時蓋以申故而并戍之今未知其國之所在計亦不遠於

申許也

路史曰炎帝器生祝庸祀庸為黃帝司徒居於江水生術鬻兒首

方顛是襲土壤生條及句龍句龍為后上能平九州是以社祀生

垂垂為堯工生噎鳴是為伯夷伯夷為虞秩宗封呂生太嶽襲呂

社預謂在南陽宛西而太公乃出東呂呂莒也在密之霍邑亦曰莒縣

呂唐初為呂州圖經以新蔡為古呂國蓋後來之呂近申在周亦

曰甫一作邠呂侯為穆王司寇訓夏贖刑春秋初入於楚

竹書夷王二年蜀人呂人來獻瓊玉

卮言曰申呂二國諸書多並言之詩云生甫及申國語史伯云申

呂方強是也申後入楚為縣而呂不可考矣按志今河南新蔡縣

古呂國

申

竹書周孝王元年命申侯伐西戎宣王七年王錫申伯命

詩大雅曰維嶽降神生甫及甲維申及甫維周之翰

集註宣王之舅申伯出封於謝而尹吉甫作詩以送之申伯之先神農之後爲唐虞四嶽總領方岳諸侯而奉嶽神之祭能修其職嶽神享之故此詩推本申伯之所以生以爲嶽降神而爲之也

二章曰豐豐申伯王纘之事於邑於謝南國是式王命召伯定申伯之宅登是南邦是執其功

曹氏曰漢地理志南陽宛縣有申伯國棘陽縣東北百里有謝城其地蓋相近申伯先封於申宣王使紹封於謝也

廬陵彭氏曰申伯之先已爲諸侯故王使繼其事而邑於謝式於南邦此加他進爵之賞也

三山李氏曰申侯爵以其爲方伯故謂之申伯

三章曰王命申伯式是南邦因是謝人以作爾庸王命召伯徹申伯土田王命傅御遷其私人

集註徹定其疆界正其賦稅也傅御申伯家臣之長也私人家人遷使就國也漢明帝送侯印與東平王蒼諸子而以手詔賜其國中傳蓋古制如此

七章曰申伯番番既入於謝徒御嘽嘽周邦咸喜戎有良翰不顯申伯王之元舅文武是憲

史記初幽王娶申侯女爲后生太子宜臼後得褒姒愛之生子伯服竟廢申后及太子以褒姒爲后伯服爲太子宜臼奔申申侯怒與緡西夷大戎攻幽王遂殺幽王驪山下於是諸侯乃卽申侯而

共立故太子宜曰是爲平王

國語史伯曰王欲殺太子以成伯服必求之申申人弗畀必伐之若伐申而繒與西戎會以伐周周不守矣繒與西戎方將德申申呂方強其隩愛太子亦必可知也王師若在其救之亦必然矣王心怒矣虢公從矣凡周存亾不三稔矣

竹書幽王三年王嬖褒姒五年王世子宜曰出奔申侯聘西戎及鄆十年王師敗於申十一年申人鄆人及犬戎入宗周弑王申侯魯侯許男鄭子立宜曰於申

詩王風曰揚之水不流束薪彼其之子不與我戍申

集註申姜姓之國平王之母家也平王以申國近楚數被侵伐故遣畿內之民戍之

孔氏曰言戍甫戍許者以其俱爲姜姓旣重章以變文因借甫許以言申其實不戍甫許也六國秦趙同爲嬴姓史記漢書多謂秦爲趙亦此類也

左傳莊公六年楚文王卽位與巴人伐申三十年楚申公闞班殺楚公子元

春秋僖公七年夏鄭殺其大夫申侯

僖公四年諸侯盟於召陵陳轅濤塗謂鄭申侯曰師出於陳鄭之間國必甚病若出於東方觀兵於東夷循海而歸其可也申侯曰善濤塗以告齊侯許之申侯見曰師老矣若出於東方而遇敵懼不可因也若出於陳鄭之間共其資糧屝屨其可也齊侯說與之虎牢

鄭邑今泥水縣

執轅濤塗諸侯伐陳陳成歸轅濤塗濤

塗怨申侯之反已故勸之城其賜邑曰美城之大名也子孫不
忘吾助子請乃爲之請於諸侯而城之美遂諧諸鄭伯曰美城
其賜邑將以叛也申侯由是得罪七年鄭殺申侯以說於齊
初申侯申出也有寵於楚文王文王將死與之璧使行曰惟我
知女專利而不厭予取予求不女疵瑕也後之人將求多於女
女必不免我死女必速行無適小國將不女容焉既葬出奔鄭
又有寵於厲公子聞其死也曰知臣莫若君非可改也已
杜氏曰申本國名而臣於楚故以國爲氏侯名也或云申女所
生蓋楚甥也

路史曰周初封太嶽後於申暨申伯人謝而楚蝕其壤今信陽軍
之方城內也唐申州之南陽漢之宛縣

通考曰按申伯爲蕃翰於宣王之時及幽王廢申后而申侯召犬
戎伐周弑王以世考之申侯卽申伯子也平王東遷王室微弱方
且遣兵戍申以召譏刺蓋申侯忘父之忠而召戎以禍王室平王
復忘父之讐而勒兵以戍母家皆非善繼志之孝子也楚滅申春
秋無明文然僖二十五年楚以申息之師戍商密其時息已亾則
所謂申息皆楚邑也申滅於楚可知楚滅申使闞班尹之爲申
公又申侯爲鄭大夫詳前

謝

路史曰申伯封謝荊州記棘陽東北謝城是有謝水

棘陽城在唐
之湖陽西北

紀

史記周夷王時紀侯諧齊哀公於周周烹哀公

左傳隱公元年紀人伐夷

春秋隱公二年秋九月紀履緌來逆女冬十月伯姬歸於紀

左傳卿為君逆也

公羊傳紀履緌者何紀大夫也向以不稱母母不通也外逆女不書此何以書譏爾何以譏譏始不親迎也

紀子伯莒子盟於密

程子曰闕文也當云紀侯某伯莒於盟於密左氏附會作帛杜預以為裂繻之字春秋無大夫在諸侯上者公穀皆作伯

廬陵李氏曰程子紀子伯之說胡氏因之然紀本非子爵則程說亦未至恐子上猶有闕字也臨川吳氏曰子伯二字或是侯字之誤

桓公二年秋七月紀侯來朝

公穀傳皆作紀

程子曰凡杞稱侯者皆當為紀杞爵非侯文誤也及紀侯大夫其國之後杞不復稱侯矣

汪氏曰或以紀侯朝弑君之桓不貶從滕子之同同然穀鄧邾葛牟不貶從同同之例蓋聖人憫紀之小弱傷其無所赴愬而求援於姻國故原情以恕其罪也何休范甯以紀為進爵則亦未知隱二年杞子之為闕文耳

三年夏六月公會杞侯於郕

張氏曰紀與魯親而求援於魯以抗齊鄭故桓公因其來朝與之會也

五年夏齊侯鄭伯如紀

胡傳按左氏齊鄭朝紀欲以襲之紀人知之夫如者朝詞也尊

不朝乎卑大不朝乎小紀之爲紀微乎微者也齊在東州尊則方伯鄭亦大國也並驅而朝紀乃懷詐諉之謀欲以襲之而不虞紀人之覺也其志憖矣

廬陵李氏曰春秋之初齊僖鄭莊皆小人之雄合謀以同心吞噬小國爲事自二君如紀之後紀百計求援六年會於邲其冬來朝謀於魯也深矣九年季姜歸京師托於周也至矣十一年鄭莊卒齊鄭之黨方散故十三年紀侯歸魯鄭而僥倖於一勝然怨愈構矣十四年齊僖卒襄公立十七年於黃之盟魯欲平二國也而襄公方襲小伯之獎豈顧一盟而棄先業哉故莊元年而遷三邑矣三年而紀季以鄆入齊矣齊魯方盛鄭乃棄紀而爲垂之遇矣

六年夏四月公會紀侯於邲冬紀侯來朝

左傳會於邲紀來諮謀齊難也冬來朝請王命以求成于齊公

告不能

紀微弱不能自通於天子欲因公以請王命公無寵於王故告不能

九年春紀季姜歸於京師

十二年夏六月公會杞侯莒子盟於曲池

程子曰杞侯皆當作紀隱二年紀莒盟於密是時紀謀齊難故魯桓與之盟莒以援之耳

十三年春二月公會紀侯鄭伯已巳及齊侯宋公衛侯燕人戰齊師宋師衛師燕師敗績

胡傳齊紀者世讐也齊人合三國以攻紀魯鄭援紀而與戰戰而不地於紀也齊爲無道恃強凌弱此以紀爲主何也紀人不

度德不量力不徵詞輕與齊戰而爲之援者弒君篡國之人也
不能保其國自此戰始矣春秋以紀爲主省德相時自治之意
也

十七年春正月丙辰公會齊侯紀侯盟於黃

汪氏曰紀魯之與國而衛朔在齊故欲納朔而魯欲平紀也然
二年之後齊遂遷紀六年之後魯卒會齊納朔則非紀之削弱
盟不足恃而齊魯之強弱亦具見矣

莊公元年冬十月齊師遷紀邾鄆

胡傳邾鄆鄆者紀三邑也邑不言遷遷不言師其以師遷之者
見紀氏猶足與守而齊人強暴用大衆以迫之爲已屬也

張氏曰穀梁云紀國也邾鄆鄆國也或曰遷紀於邾鄆鄆按下
有紀侯大去其國則此時未遷故知是紀之三邑

劉氏曰齊一師必不能並遷兩國取二取防猶分別言之况兩
國乎

卮言曰此傳穀梁兩說俱可通三邑之說竊恐未然外取邑不
書此何以書且紀已將亾何必遷其三邑乎遷宿遷陽皆不稱
師而此曰師者則以並遷之故三小國不能當一大邑以齊之
強何難爲之取郛取防則內事耳諸儒之義猶未洽也

三秋紀季以鄆入於齊

公羊傳紀季者何紀侯之弟也何以不名賢也何賢乎紀季服
罪也其服罪季何魯子曰請後五廟以存姑姊妹
穀梁傳鄆紀之邑也入於齊者以鄆事齊也入者內弗受也

杜氏曰齊欲滅紀故季以邑入齊爲附庸先祀不廢故書字貴之鄆紀邑在齊國東安平縣

陳氏曰紀侯在而季以鄆入齊若以邑叛其稱字紀侯意也齊襄自桓始年挾鄆以圖紀黃之會魯爲之求成不得免焉遷邾鄆鄆紀之不絕也如綫季以鄆入齊紀於是乎始判是分國以與之也齊人所欲者吾土也苟可以免祀是紀侯意也故稱字四年夏紀侯大去其國

左傳紀侯不能下齊以與紀季夏紀侯大去其國違齊難也公羊傳大去者何齊滅之不言滅者爲襄公諱故也春秋爲賢者諱何賢乎襄公復讐也何讐爾遠祖也哀公烹乎周紀侯諱之遠祖者幾世乎九世矣九世猶可以復讐乎雖百世可也

穀梁傳鄆紀之邑也大去者不遺一人之辭也紀侯賢而齊侯滅之不言滅者不使小人加乎君子胡傳聖人與其不爭而去是以異於失地之君而不名不與其去而不存是故書叔姬歸鄆而不錄紀侯之卒明其爲君之也未卮言曰按紀地在今山東壽光縣

鄆

莊公三年秋紀季以鄆入於齊十三年春王正月紀叔姬歸於鄆何氏曰鄆不繫齊者時齊聽後五廟故國之

陳氏曰紀亾矣曷爲謂之紀叔姬存紀也國滅而後見者善辭也是故紀亾書紀叔姬陳亾書陳災

路史曰故穀城西有地曰鄆下續述征記安平有鄆亭安平齊廢

今隸臨淄

鄆

春秋莊公三十年秋七月齊人降鄆

公羊傳鄆者何紀之遺邑也降之者何取之也取之則曷爲不言取之爲桓公諱也外取邑不書此何以書盡也

胡傳鄆者紀之附庸微乎微者也齊人不道肆其強力脅使降附不書鄆降而曰降鄆者以齊之強故罪之深以鄆之微故責之薄

啖氏曰公穀云鄆紀之遺邑按鄆自是小國爾紀之全國猶不敢敵齊豈一邑之民而能二十年餘年獨拒齊乎

杜氏曰鄆紀附庸國東平無鹽縣東北有紀鄆城

路史曰今懷仁東北有紀鄆城莊公之三十年齊人降鄆高赤俱云紀邑在密然時紀亾二十年矣故啖子攻之

向

春秋隱公二年夏莒人入向

左傳莒子娶於向向姜不安莒而歸夏莒人入向以姜氏還

臨川吳氏曰向姜姓小國炎帝之後

汪氏曰穀梁以向爲我邑然不書伐我則非我邑也據後書公伐莒取向則向爲小國而莒滅之耳

又宣公四年春公及齊侯平莒及郟莒人不肯公伐莒取向

路史曰河陽西北有向城故紀年曰鄭侯歸晉陽向十三州志云軹縣南山西曲有故向城卽周之向國然世以爲承之向乃

莒邑宣四年伐莒取向者是非姜國也蓋因傳姜不安莒而以爲近莒耳

卮言曰按志今山東莒州南有向城路史謂向國在軹縣則今之懷慶府濟源縣

州舟

春秋桓公五年甲戌冬州公如曹

左傳淳于公如曹度其國危遂不復

杜氏曰淳于州國所都城陽淳于縣近莒

程子曰州公嘗爲王三公故稱公不能保其國去如曹遂不復臨川吳氏曰此人君之失國者與紀侯大去其國同但州公之

去國有所如紀侯之去國無所如爾凡國君去如他國皆朝也蓋其國危公將寄託於曹假朝禮以行實則奔也

羅氏曰王之三公稱公云寰內侯者非也左氏爲卽淳于

張氏曰州稱公與祭公同則州必畿內之地河內州縣也左氏乃云淳于公杜注城陽淳于縣州國所都昭元年傳云城淳于或云因州公不反國爲杞所并遂以淳于爲都

輿地廣記曰高密夷安城淳于本春秋州國也

卮言曰按一統志今湖廣監利縣

六年春正月寔來

左傳自曹來朝書曰寔來不復其國也

公羊傳寔來者何猶曰是人來也孰謂謂州公也

及國語卷八
程子曰五年冬如曹尚爲君也故以諸侯書之今不能反國則匹夫也故名之來來魯也忽稱鄭忽明其正也寔不稱州亾其國也

胡傳寔者州公名也春秋之法諸侯不生名失地滅同姓則名或曰諸侯失國而後託於諸侯孟子以爲禮也今州公來朝將以諸侯之禮接之乎則春秋乃書其名將以匹夫之賤畜之乎孟子乃以託國爲禮將何處而可曰諸侯有壤地褊小迫乎大國之間而失國是不幸焉非其罪也則以諸侯之禮接之可也若譚子在莒弦子在黃温子在衛雖失國出奔而春秋不名義可見矣若夫自取滅亾如蔡獻舞邾益曹陽州寔之徒則待之以初乃禮之過也觀春秋名與不名則知所以處寓公之禮與強爲善及自暴棄者之觀戒矣

淳于

路史曰淳于故城在高密之安丘東北故淳于縣屬北海郡元云本夏之斟灌國武王以封淳于公杞併之遂遷江南預云華容今監利也

卮言曰左傳以淳于卽州而路史爲二疑州公不反國并于杞遂遷淳于之說爲是或淳于又爲杞所并而復遷也

駘

路史曰昔者帝嚳取於有駘氏曰姜嫄生后稷而后稷之封亦曰駘說者咸謂帝堯以其母國封之然及太王復取於有駘氏曰太姜是姜姓之駘至周猶在豈得云以是而封稷哉乃不知稷封之

駘在於武功而姜姓之駘在於琅邪固不同也前事之缺失可勝
悼哉今沂之費縣南故駘亭地接齊邾故越使魯還邾田封境至
于駘上泊泉公時齊亂景公子荼遷于駘

怡

路史曰怡一曰墨怡亦作台禹有天下封怡以紹列山是為默台
成湯之初析之今支是為孤竹

孤竹

路史曰伯夷叔齊父孤竹君國今盧龍東有古孤竹城秦之離支
縣漢令支也營州皆其地

戲

路史曰酈山之北水名戲今新豐有戲亭幽王以焉或云幽夜戲
此而名安也

甘

路史曰甘盤國

薄

路史曰拱之考城東北有薄城漢縣屬山陽本宋地

小顛

路史曰參盧命蚩尤邑於小顛即今安邑有蚩尤城

詳前帝王
門蚩尤章

黑齒

山海經曰黑齒之國帝俊在其中

阪泉

路史曰阪泉氏姜姓其後蚩尤彊伯

氏

山海經曰炎帝生伯陵伯陵生鼓鼓生靈恣靈恣生氏人爲氏國
氏人能上下於天

玄氏

山海經曰伯夷父生西岳西岳生先龍先龍始生氏羌氏羌乞姓
路史曰秦嶽生先龍先龍生玄氏玄氏乞姓羌也蓋岐隴而南漢
川以西皆氏云湯革夏伐氏氏人來朝其別爲青白蚺之三氏氏
羌數十白馬最大今文鳳二竟白馬氏者居仇池曰氏侯

赤狄

路史曰赤狄隗姓故山黨地

路

春秋宣公十五年六月癸卯晉師滅赤狄潞氏以潞子嬰兒歸

左傳潞子嬰兒之夫人晉景公之姊也酆舒爲政而殺之又傷
潞子之目晉侯伐之六月癸卯晉荀林父敗狄赤狄於曲梁
辛亥滅潞酆舒奔衛

公羊傳潞何以稱子潞子之爲善也躬足以亾爾雖然君子不
可不記也離於夷狄而未能合於中國晉師伐之中國不救狄
人不有是以亾也

穀梁傳滅國有三術中國謹日甲國月夷狄不日其日潞子賢
之也

胡傳滅而舉號及氏者滅見滅之罪著滅者之甚不仁也潞嬰
兒不歿社稷比於中國而書爵者免嬰兒之責詞也

劉氏曰公羊之說非也夷狄之君稱周禮也非爲善而亾也益迷於有爵爾穀梁之說亦非也豈有國滅身虜而得爲賢哉路史曰炎帝參盧禮於黃帝黃帝封參盧於路一作露亦作潞始封在茶陵商周間衍於河東北春秋之潞子都曲梁卽雞澤也齊邑亦有潞一云土軍縣今有地曰露漢之東露而幽之潞縣亦有潞水知後代之承襲猶殷商楚郢所至以爲名也路之別爲赤白之狄狄歷虜咎皐皐落九州之戎

卮言曰按一統志今山西潞州古潞子國

甲氏

留吁

宣公十六年春王正月晉人滅赤狄甲氏及留吁

胡傳按左氏董是役者士會也甲氏潞之餘種留吁其殘邑也春秋於夷狄攘斥之不使亂中夏則止矣必欲盡珍滅之無遺種此士會所以貶而稱人也

羅氏曰甲氏留吁赤狄別種春秋書曰師曰人晉固罪矣然在春秋戎狄舉號君臣同辭固未得以名氏爵號書也今晉其國又書其氏又列其名爵又別其種族經之文始異於是若三傳說爲賢之者其果然耶潞氏甲氏蓋亦先王之世漸流於狄而非狄之出也既有爵邑有名號則其爲書固不得而略矣夫伐國者討其罪人斯已矣潞子之夫人晉景公之姊也據傳之說豐舒爲政殺之則豐舒者罪矣晉之致伐則執豐舒僂之立黎侯安潞子紀其政而還則諸戎至矣而顧滅其國執其君哉踵是以降伐虜咎如敗狄於交剛於太原一皆晉人有以見晉之

不能仁義禦於為奪易絕人之世也三五而來未聞有賢狄也

狄歷

後為勅勒

唐咎

阜落 在潞

厄言曰路史以狄歷唐咎如阜落為赤狄之種隗姓要之皆羣狄也詳後戎狄章不系於此

姜戎

史記宣王三十九年戰於千畝王師敗績於姜氏之戎

索隱曰千畝地名在西河介休縣姜戎西夷別種四嶽之後也

春秋僖公三十三年夏四月辛巳晉人及姜戎敗秦師於殽

左傳晉文公卒秦師滅滑晉先軫遂發命遽興姜戎子墨衰經

四月辛巳敗秦師於殽

公羊傳具言及姜戎何姜戎微也稱人亦微者何言乎姜戎之

微先軫也或曰襄公親之襄公親之則其稱人何貶易為微

在乎殯而用師危不得葬也

杜氏曰姜戎姜姓之戎居晉南鄙戎子駒支之先也

左傳襄公十四年諸侯會於向將執戎子駒支范宣子親數諸朝

曰來姜戎氏昔秦人迫逐乃祖吾離於瓜州吾離

被苦蓋蒙

荆棘以來歸我先君先君惠公有不腆之田與汝剖分而食之今

諸侯之事我寡君不知昔者蓋言語漏泄則職汝之由詰朝之事

爾無與焉與將執爾對曰昔秦人負恃其衆貪我土地

逐我諸戎惠公蠲其大德謂我諸戎是四嶽之裔胄也

毋是翦棄賜我南鄙之田狐狸所居豺狼所嗥我諸戎除翦其荆

棘驅其狐狸豺狼以為先君不侵不叛之臣至於今不貳昔文公

與秦伐鄭秦入竊與鄭盟而舍戍焉於是乎有殺之師晉禦其上
戎亢其下秦師不復我諸戎實然自是以來晉之百役與我諸戎
相繼於時以從執政猶殺志也豈敢離邊今官之師旅無乃實有
所闕以携諸侯而罪我諸戎我諸戎飲食衣服不與華同贄幣不
通言語不達何惡之能為不與於會亦無曹焉賦青蠅而退宣子
辭焉使即事於會成豈悌也

羅氏曰王符云炎帝後姜戎伊洛陸渾也左傳戎子駒支所謂諸
戎楊柘泉臯伊洛陸渾之戎皆是也與允姓陰戎各別平王之末
渭首有狄獯邽冀之戎涇北有義渠邠洛川有大荔戎渭南有驪
戎潁首有蠻氏戎洛川有大荔戎伊洛有楊柘泉臯之戎義渠大
荔驪戎為少昊後他皆姜姓鄭樵猶以九州戎為陰戎駒支居魯

南鄙踈矣

楊柘 泉臯 伊洛之戎

左傳僖公十一年夏楊柘泉臯伊雒之戎同伐京師入王城焚東
門王子帶召之也秦晉伐戎以救周秋晉侯平戎於王

陸渾

左傳僖公二十二年傳曰初平王之東遷也辛有適伊川見被髮
而祭於野者曰不及百年此其戎乎其禮先亾矣秋秦晉遷陸渾
之戎於伊川

春秋宣公三年春王正月楚子伐陸渾之戎

左傳楚子伐陸渾之戎遂至於雒觀兵於周疆

胡傳夷狄相攻不志此其志何也為陸渾在王都之側戎夏雜

處族類之不分也楚又至洛觀兵於周疆問鼎之大小輕重焉故持書干策以謹之

杜氏曰允姓之戎居陸渾在秦晉西北僖二十二年秦晉遷之於伊川遂從戎號

羅氏曰左傳昭公元年周甘人與晉人爭閭田晉率陰戎伐潁王使詹桓伯曰先王居擣杭仁四裔以禦螭魅故允姓之姦居於瓜州惠公歸自秦而誘以來使偪我諸姬入我郊甸則戎焉取之戎有中國誰之咎也此卽姜戎非允戎也

卮言曰按一統志今河南嵩縣古陸渾氏

昭公十七年八月晉荀吳帥師滅陸渾之戎

左傳晉侯使屠蒯如周請有事於維與三塗襄弘謂劉子曰客容猛非祭也其伐戎乎陸渾氏甚睦於楚必是故也君其備之乃警戎備九月丁卯晉荀吳涉自棘津使祭史先用牲于維陸渾久弗知師從之庚午遂滅陸渾數之以其貳於楚也陸渾子奔楚其衆奔甘塵周地周大獲宣子慶文公攜荀吳而授之陸渾故使穆子帥師獻俘于文宮

胡傳林父之於潞氏士會之於甲氏荀吳之於陸渾戎皆滅之也而林父士會稱師稱人荀吳舉其名氏何哉夷不亂華陸渾之戎密邇王室而縱之雜處則非膺戎狄別內外之義也與闢土服遠以圖強霸則異矣然舉其名氏非褒詞也纔得無貶耳則窮兵於遠虛內事外者可知矣

汪氏曰戎居諸夏之區固中國之大害也晉武不能徙戎卒至

於神州陸沉則中行穆子之滅陸渾疑可褒矣然陸渾之戎涉
居秦晉之西北在荒服之外自晉與秦遷之於伊川侵逼王幾
則是晉人始謀不滅之過也今也與楚爭強掩其不備而滅之
蓋不足以贖前過矣奚可褒之有哉

學海君道部卷之二十八

世系類二十

列國譜系九

古國篇二

黃帝後國章

熊

路史曰黃帝開國于熊今之新鄭輿地記云古有熊國黃帝所都

云都非乃
帝之開國

壽丘

史記曰黃帝生于壽丘

陳

路史曰黃帝都陳今鳳翔寶雞故陳倉有陳山非宛丘

昌

路史曰黃帝子昌意始封于昌然任後自有昌黃帝臣又有昌若
宜昌邑其東昌故縣近滹沱河有昌亭西昌縣春秋昌間多在河
東北

若水

路史曰黃帝元妃西陵氏生昌意玄囂龍苗三人昌意遜居若水
今越嶲之臺登盟會圖疏以為郡故世本云允姓國昌意降居為

侯非也

詳帝王曆系
高陽氏世章

江水

路史曰玄囂降居江水若之下流泝水也

卞

路史曰龍苗生吾融吾融生卞明封于卞為卞氏湯代有卞隨或
云卽弁以說文字林大小篆無卞非也今泗水縣有卞故城漢屬

魯國

清

路史曰黃帝次妃方纍氏生休及清休繼黃帝為帝鴻氏清封于
清為紀姓是生少昊一曰青陽按清有四一在鄆隱公四年遇于
清者一在濮宣十二年晉宋盟清丘者一在并解宣十三年赤狄
代晉及清者一在樂平成十七年國勝待命于清者

詳帝王曆系
少昊氏世章

張

路史曰黃帝次妃彤魚氏生揮及夷彭揮次十五主造弧矢及司

率呂受封於張陳子昂張氏銘云軒轅錫胤弧矢崇威是也然黃
帝臣自有張若故河東解有張陽城漢之東張今邢之任縣是紀
年齊師逐鄭太子齒奔城張陽南鄭是也

紀

路史曰紀劇要爲一國故寰宇記古紀城在壽光南又有劇南城
云故紀國鄭樵云紀後遷劇所謂胸劇云紀劇聲訛非也

采

路史曰夷彭子紀姓始封於采故左人地今中山之北平王符以
采任姓非也

蒼林

路史曰黃帝次妃嫫母生蒼林禹陽蒼林姬姓

國語晉胥臣曰黃帝之子二十五人其同姓者二人而已惟青陽
與夷彭爲已姓其同生而異姓者四母之子別爲十二姓凡黃
帝之子二十五宗其得姓者十四人爲十二姓姬曹祈已滕箴任
苟僖姑儂依是也唯青陽與蒼林氏同於黃帝故皆爲姬姓

羅氏曰古書大概可質然不容無繆國語言青陽與夷彭同爲
紀姓是矣而又云青陽與蒼林爲姬姓則非也夫姬姓乃玄囂
而非青陽黃帝之子二十五人其十二人爲十一姓餘十三人
皆姬也今乃云惟二人同於黃帝者爲姬姓其可信耶且昌意
玄囂蒼林揮皆姬姓者豈惟二人哉

羅氏曰舜受禪水土平伯禹於是邳成五服至於五千四海會同
爰申錫其土姓以立其國姓以立其宗土姓錫而宗國定矣公侯

百里伯七十里子男五十里所以立國雖斷密雖滕箴祈西釐邳
儼依此所以立宗也國立而後氓人有所依宗立而後族姓有所
繫人有所依斯有以君之族有所繫斯有以宗之是故公劉遷邠
有爲致力朝廷而君之者有爲致力宗廟而宗之者本於土姓之
有所錫也傳曰天子建德因生以賜姓胙之土而命之氏胙之土
錫土也命之氏錫姓也契封之商稷與邠此錫土也賜之子與姬
此錫姓也方水土未平諸侯固各有國土百官亦各有族姓矣必
九州攸同而後錫之者前乎此惟有所不普至是而後得以錫之
偏爾

釐

路史曰釐僖也齊國釐城爲來音簡王時舒庸人道吳圍巢及釐

任

路史曰黃帝之子禹陽最少受封於任爲任姓今邢之任縣

禹

山海經曰黃帝生禹鯀禹鯀生禹京禹京處北海禹鯀處東海是
惟海神

又曰帝俊生禹號禹號滢梁滢梁生番禺是始爲舟番禺生奚仲
奚仲生吉光吉光是始以木爲車

路史曰禹卽番禺一作遇王符作卑過訛禹陽是爲禹號生禹京
僇梁僇人京居北海號處南海僇梁生番禺今清河之屬縣有禹
山此卽禹也番禺是始爲舟生奚仲奚仲生吉光是主爲車建侯
於薛或云禹湯十二世生奚仲姓纂黃帝子弟十二人以薛爲姓

一爲任氏六世生奚仲俱非也奚仲十二世仲虺爲湯左相始分
任大戊時臣扈武丁時祖已皆國薛祖已七世成遷爲摯有女歸
周是曰太任誕生文王武王克殷封其後薛仲爲薛侯

奚

路史曰今滕之東南有奚公山

邳

路史曰今淮之邳州有仲虺祠

摯

詩大雅大明曰摯仲氏任自彼殷商來嫁於周
國語史蘇曰摯疇之國由太任

賈注曰摯疇二國奚仲仲虺之後太任之家

唐世系表曰祖已七世孫曰成徙國於摯

疇

謝

路史曰謝本任國周滅之以封申伯

章

路史曰章任姓周始以封太公支子

舒

路史曰春秋之留舒亦曰柳舒

洛

竹書夏帝癸二十一年商師征有洛克之
路史曰周書有洛氏或作給

終

路史曰謝章舒洛昌剡終泉甲遇皆任分也終為夏太史終古國後歸商

泉

甲

儋人

牛黎

邳

路史曰邳即佶一作吉風俗通云殷時侯國潛夫論云邳與姑同而字異周封女姑氏於南燕邳名世以潛夫為誤非也

南燕

左傳隱公五年鄭人侵衛衛人以燕師伐鄭鄭敗燕師於北制春秋桓公十二年秋七月公會宋公燕人盟於穀丘三年春二月公會紀侯鄭伯及齊侯宋公燕人戰齊師宋師燕師敗績

左傳莊公十九年秋五大夫奉王子頹以伐王不克

燕師伐周立子頹二十年春鄭伯和王室不克執燕仲父

路史曰南燕姑姓伯儵封國石癸云吾聞姑姓后稷元妃又詩云蹶父孔武靡國不到為韓姑相攸莫如韓土此皆南燕姑姓也亦嘗曰東燕云

密湏

詩大雅曰密人不共敢拒大邦侵阮徂共王赫斯怒爰整其旅以

還徂莒

集註密密湏氏也姑姓之國在今寧州

左傳曰密湏之鼓與其大路文所以大蒐也

杜注曰密湏姑姓國文王伐之得其鼓路

國語史蘇曰密須之亡由伯姑

呂氏春秋曰密須之民自縛其主而與文王

括地志曰陰密故城在涇州鶉觚縣西東接縣城卽古密國

輿地廣記曰商時密國之地本鶉觚縣隋取文王伐密而民始附
之意以靈臺名縣

路史曰密須闕允蔡光敷偪離斷密雖皆姑分也密須商世侯國
文王伐之今涇之保定有陰密城

卮言曰按志今陝西靈臺縣古密須地

密

路史又曰河南密縣東四十里有故密城唐爲密州與須城比故
說者謂卽密須蓋亦號密須云與安定姬姓之密別

鮮

路史曰鮮開封長垣近須城是後爲衛邑詩云思須與曹錄聲轉
也

蔡

路史曰蔡姑姓國今蘄春廣濟縣是非姬姓之蔡

魯

路史曰魯姑姓國今汝之魯山縣非堯地

闕

路史曰鄆之壽張有闕鄉而闕故城在中都闕亭文在須昌東南

允

路史曰高陽氏允格或云少昊後

雒

路史曰鄭莊公夫人雒姑國今汴之雒丘是

偃

路史曰晉襄公母偃姑國即偃陽偃陽姁姓同

厄言曰春秋諸侯滅偃陽是晉悼公時事傳謂姁姓國也而晉襄公母有偃姑悼公去襄公未遠當是二國殊地而路史以為一處解在高陽後章亦未詳考

斷

路史曰斷即卷楚也世史作段誤

六

羅氏曰黃帝之子二十五人為姓十二姬釐俱帝而任姁二姓為

有二十九國其它子姓固稱是也禮傳曰舜即位封黃帝之子孫十有九人為侯伯蓋不得攷矣

祈

路史曰祈斬也歐陽脩祁公銘以祁為黃帝之子所封非也祁少昊後祈黃帝後

酉

滕

路史曰今徐之西南十四里有故滕城古薛縣小祁國一作勝紀年越王朱句二十年滅滕是也春秋閔公二年共滕之民乃衛之下邑

箴

笱

路史曰筭作苟戰國有苟變程氏世譜以河內多杞氏非

僮路史云僮
嬛同音暄

依

國語周史伯曰依疇歷莘皆鄆音後屬鄭韋昭云國名

滑

濟

路史曰滑濟二國名衆地博有不可得而考六

詹

潛夫論姓氏志曰詹資鄆翟黃帝之後也

左傳莊公二十年惠王取為國之圃以為囿而奪詹父田故為國

詹父子禽祝跪作亂五大夫奉子頹以伐王不克昭公九年周甘

人與晉爭閭田晉率陰戎伐頹王使詹桓伯辭於晉晉致閭田

厄言曰詹之為國興廢莫攷惠王時有詹父景王時有詹桓伯皆

為周大夫

資

路史曰姓纂云益州資中今資州資陽有資川江然古資陽城在

簡之陽安而祁之無極有資河衛之北糾山潭之益陽有資水出

縣北流入資口即益水酈云即資水之殊目武岡又有資水出唐

或其派裔

鄆

路史曰潛夫論詹資鄆翟黃帝之後也故王篇云資鄆故國黃帝

後封在岐山之陽所謂周原膺膺者顧伯邳云昌意後止於夏商

翟

卮言曰翟之系多矣以其同名為翟也故總系之四夷篇

薊

路史曰薊舊為荆黃帝後國中絕武王克商封帝之裔於此始為

薊記皆為

安息

路史曰昌意生三子長曰乾荒生帝顓頊次曰安季曰悃安處西

上後曰安息

党

路史曰悃遷北土後為党項

蠻人

山海經曰黃帝生苗龍苗龍生融吾融吾生弄明弄明生白犬白

犬有牝牡是為犬戎

路史曰卞明棄其守降之南裔生白犬是為蠻人之祖湖南北桂

林等處皆辰澧沅湘之間尤盛

羅氏曰有自辰沅來者云盧溪縣之西百八十里武山焉其崇

千仞遙望山半石洞罅啓一石貌狗人立乎其傍是所謂槃瓠者

今縣之西南三十有槃瓠祠棟宇宏壯信之天下有奇迹也予曰

是黃閔武陵記所志者然實誕也曰然則所謂槃瓠者非歟曰非

也何以言之予稽夏后氏之書知之也山海經云卞明生白犬是

為蠻人之祖卞明黃帝之曾孫也白犬者乃其子之名蓋若後世

之鳥虺犬子豹奴虎狔云者非狗犬也雖然世之誕妄厥有形影

其言之不典亦實自於經也按經又言下明生白犬白犬有二自相牝牡郭氏以爲自相配合蓋若今之婆羅門半釋迦者而應劭遂以爲高辛氏之犬名曰槃瓠妻帝之女乃生六男六女自相夫婦是爲南蠻則知其說原衍於此是殆以白犬爲犬爾至郭璞張華干寶范曄李延壽梁載言樂史等各自著書枝葉其說人以喜聽而事遂實矣且其說曰高辛氏募有得犬戎吳將軍首者黃金千鎰邑萬家妻以少女杜君卿固疑其誕謂黃金古以斤計至秦始曰鎰二也三代分土漢始分民古安得萬家之封二也將軍周末之官三也吳姓宜周始有四也佑之難亦當矣又引其獄中與諸甥詩證之然不知其說之不出乎曄也吳姓古有之將軍官號占亦有之但謂夷狄古無姓無官可也夫人畜之交通世蓋每有昔元嘉中孟慧度之婢與犬通

處者且逾年然高辛之事常竊誕之槃瓠者特獾狐之轉爾按玄中記槃瓠浮之東南海中是爲犬封氏蓋因本風俗通然亦不謂蠻人之祖然則盧溪之祠君武山之像何彰耶曰見石西俯則以爲惠遠點頭見石東僂則以爲秦皇赴海木石之象物厥類多矣偶然喚作木居士豈特一槃瓠而已邪不然犬戎國之神哉經亦有云犬戎國有犬戎神人面而獸身非蠻人之祖也

髦民

山海經髦民國在積石

狂犬

羅氏曰余按傳記見蠻夷之種多帝者之苗矣若巴人之出於伏羲玄氏羗九州戎之出於炎帝諸蠻髦民党項安息之出黃帝白

民防風驩臯三鮒之出帝鴻淮夷允戎鳩藜羣舒之出少昊昆吾
滇濮甌閩駱越之出高陽東胡僖人暴興吐渾之出高辛兕奴突
厥沒鹿無餘之出夏后曰是固有矣縉雲之子黃帝之孫其始不
肖以至不材幾何而不胥爲夷也遼東存箕子之佃大夏有李陵
之苗信矣然元魏自以出於蒼林慕容自以出於厭越赫連自以
出於伯禹而祿山亦謂安息出於昌意之子安足果信邪余嘗言
之夷蠻之醜雖有盛疆苟非先王之後者皆不足以得志於中國
彼之所傳亦必有所本矣且時聞之春秋用夏變夷者夷之夷而
進於中國則中國之彼以是心至斯受之矣不然則求之四夷而
從鳳嬉何陋之有

白民

山海經曰大荒中有山名曰明星有白民之國帝俊生帝鴻帝鴻
生白民白民銷姓黍食

路史曰帝鴻釐姓繼黃帝者生白民白民銷姓是爲白民之祖故
山海經云白民銷姓國而汲冢書言白民之國今之白州亦見博
物志孔晁以爲東南夷與白州接

防風

國語曰吳伐越隳會稽獲骨節專車吳子使來聘問之仲尼仲尼
宴之客執骨而問曰敢問骨何爲大仲尼曰昔禹致羣臣於會稽
之山防風氏後至禹戮之其骨節專車此爲大矣客曰防風氏何
守仲尼曰汪芒氏之君守封禺之山者也爲漆姓在虞夏商爲汪
芒氏於周爲長狄氏今曰大夫

路史曰防風氏釐姓白民之別為防風氏守封禹之間

汪芷

說文曰封嶠山在吳楚間汪芒之國歷代故以為防風

路史曰即汪罔釐姓至商為汪泝氏

縉雲

路史曰釐姓國處州之縉雲傳謂縉雲黃帝之官非也史註縉雲

氏姜姓炎帝之裔黃時為縉雲管安矣蓋國也處州舊本帝圖經

縉山又皆以為黃帝氏失之

驩兜

書堯典帝曰疇咨若子采驩兜曰都共工帝曰吁

又舜典曰放驩兜于崇山竄三苗於三危

左傳季文子曰帝鴻氏有不才子掩義隱賊好行凶德醜類惡物

頑嚚不友是與比周天下之民謂之渾敦註謂驩兜

山海經曰大荒之中有驩頭之國鯀妻土敬士敬子曰炎融生驩

頭驩頭人面鳥喙有翼食海中魚杖翼而行

路史曰縉雲氏妻土敬氏曰炎融遺腹而生驩頭汲冢書博物志驩頭者

驩兜也弘農有地名兜志為驩兜之都然意驩為國當如魯驩未

必兜地其後竄之崇山則澧之慈利也有驩兜墓然嶺外驩州圖

經記以為其竄所樂史亦記驩州為所放處則去崇山遠矣

三苗

書堯典曰竄三苗於三危

又舜典曰三載考績三考黜陟幽明庶績咸熙分比三苗

集註分比三苗謂分其民順化與違命者猶後世部分夷狄爲
生戶熟戶也

書大禹謨曰帝曰咨禹惟時有苗弗率汝徂征禹乃會羣后誓於
師曰蠢茲有苗昏迷不恭以爾衆士奉辭伐罪三旬苗民逆命益
贊於禹曰惟德動天無遠弗届帝至誠感神矧茲有苗禹拜昌言
曰俞班師振旅帝乃誕敷文德舞干羽於兩階七旬有苗來格

金氏曰有苗始末說者不同愚嘗綜其實書之所稱前曰三苗
後曰有苗曰苗民書有異辭則事有不同矣當堯之時竄三苗
於三危罪其渠魁也又分北三苗則削其地分其民別其部落
離其黨類於以黜陟亦以銷其勢也至其後徂征之時止曰有
苗曰苗民而不復云三苗者蓋已竄之後旣分之餘所存者特

其一種耳

山海經曰顓帝生驩頭驩頭生苗民苗民釐姓

路史曰驩堯生三苗氏苗民長齒上下相冒高辛邦之堯竄之於
三危河西諸羌俱其類也

國策吳起謂魏文侯曰三苗之國左洞庭右彭蠡大山在其南殿
山在其北負固不服禹伐之

周景式曰柴桑彭澤之間古三苗國左洞庭右彭蠡負固而亡者
在衡岳潭之境而南海亦有三苗國

禹伐有苗其餘
裔以入南海

羅氏曰山經顓帝生驩頭又云鯀妻遺腹生驩頭驩頭生苗民故
世以苗民顓帝之後果以遺腹則驩頭爲禹之弟而苗民其猶子
也堯試舜禹才十歲何繇有弟若姪暴恣爲亂且苗民釐姓明甚

而黃帝子姓第七為釐苗民為驩頭之子而驩頭為帝鴻之後則知驩頭縉雲之為釐姓審矣傳言三苗為縉雲氏之子蓋驩兜猶襲縉雲之號也堯竄之于三危今戎虜瓜沙等州河西諸羌俱是其類傳云三苗與防風同出是也范曄西羌傳乃謂西羌本出三苗姜姓之別炎帝之後姓纂從之繆矣此河關西南羌也隋書以党項宕昌白狼皆三苗後益非三苗之君入仕堯朝其國仍故是以既竄而苗復叛傳言三苗所以不服者衡山在南岐山在北左洞庭之波右彭蠡之水也蓋江鄂之境禹奉命徂征而苗猶負固帝乃誕敷文德而苗格遂分北之其餘入于南海者為驩朱國

崇山

驩朱

三危

重艷詳遠國篇

學海君道部卷之二十九

世系類二十九

列國譜系十

古國篇三

少昊後國章

青

路史曰帝德攷云少昊曰清清地也一曰青陽然放清地有四一在鄆一在濮一在并解一在樂平而楚之雲陽亦曰青陽今長沙蓋帝之始封少昊父子固以為號或少昊襲先封之名以來雲陽猶商亳楚郢重名者若恩乞青陽與宿泗之青陽蓋子孫之少處者若池之青陽則特在青山之陽耳

窮桑

左傳范獻子問於蔡墨曰社稷五祀誰氏之五官也對曰少皞氏有四叔曰重曰該曰修曰熙實能金木及水使重為句芒該為蓐收修及熙為玄冥世不失業遂濟窮桑此其三祀也

杜註曰少皞即金天氏四叔其子孫也窮桑在魯北少皞所都濟成也重治木為句芒該治金為蓐收修與熙治水為玄冥各能其官濟成少皞之功故死皆為民所祀

路史曰窮桑宜在梁雖之域說咸以為魯蓋以傳謂伯禽之封為少昊之虛或其後所徙非始國窮桑也

倍

山海經曰少昊生倍伐倍降處緡淵有水四方名曰俊壇

路史曰少昊元妃生倍伐降處緡淵既封茂為茂氏

緡

左傳夏后相為澆所滅后緡方娠歸于有仍生少康

竹書紀年帝癸十一年會諸侯于仍有緡氏逃歸遂滅有緡

路史曰緡茂姓地山陽夏后世衰有緡為桀所克今濟之金鄉有古緡城鄒衍曰予登緡城以望宋都后緡國也賈逵以緡為有仍之姓妄

茂

路史曰茂一曰姑茂循言於越句吳充之瑕丘有姑茂故城

尹

路史曰少昊次妃生般為弓正是制弓矢主祀弧星封于尹慶姓

蓋亦作允

汾

左傳子產曰昔金天氏有裔子曰昧為玄冥師是生允格臺駘
駘能業其官宣汾洮障大澤以處太原帝用嘉之封諸汾川沈妣
蓐黃實守其祀今晉圭汾而滅之矣

註疏曰金天氏帝少昊也裔遠也玄冥水官之長又傳云少昊
四叔修及熙為玄冥昧當是修熙之後未知為誰之子或是其
子孫也臺駘是金天裔孫為顓頊臣帝用加之蓋顓頊也

路史曰般有子曰昧生允格臺駘俱臣高陽駘封汾川絳州正平
之汾水也故曲沃有駘

沈

路史曰沈故國在汾川晉滅之與汝南之沈別

妣

路史曰妣鄧名世云妣乃國名非姓也

蓐

路史曰蓐鄆也郊蓐俱在河南有鄆山後蓋為蓐收國

黃

都

左傳僖公二十五年秋秦晉伐都楚鬪克屈禦寇以申息之師戍
商密秦人過析隈入而繫輿人以圍商密昏而傳焉宵坎血加書
偽與子儀子邊盟者商密人懼曰秦取析矣戍人反矣乃降秦師
秦師囚申公子儀息公子邊以歸

析楚邑隈隱蔽之處繫縛輿人詐為克析得其囚俘者昏而傳

城不欲令商密
知囚非析入也

杜氏曰郡本在商密秦楚界上小國遷於南郡郡縣商密郡別
邑今南鄉丹水析一名曰科今南鄉析縣

正義曰郡本都商密後始遷于郡縣國至彼縣而滅故彼縣專
得郡名當此秦晉伐郡之時國名爲都所都之邑名商密楚以
申息之師戍商密者正謂戍都國也析是郡之別邑戍人居析
地爲商密之援

春秋文公五年夏秦人入郡

左傳初郡叛楚卽秦又貳於楚夏秦人入郡

高氏曰郡蓋微國秦以其叛而入之後遂爲楚所并楚昭王復
國之後畏吳之強去郢而都郡矣

路史曰允格封郡舊郡本商密秦楚界上小國世本云允姓國秦
入之後遷南郡今襄之宜城西南有郡亭山上有城險固郡鄉郡
水唐貞觀時嘗爲郡州通典皆作若故諸地書多以爲昌意所封
失之允格有子郡姓虞帝投之幽州是爲陰戎之祖

卮言曰按志今河南上津縣古郡國

戎

路史曰姓纂云戎州允格後金天氏之裔詹桓伯云先王居檇杙
于四裔故允姓之姦居于瓜州杜預以爲陰戎與三苗俱竄三危
後世因謂出于三苗通典等以戎子駒支爲瓜州允姓戎非也此
自姜姓爲秦所逐者

卮言曰路史以左傳所謂允姓戎卽姜戎是也而以戎州爲允姓

則非矣戎州既爲巴氏之邑自是巴姓爲昆吾之後而允戎當別有地也總系夷狄之列

皐

書舜典帝曰皐陶蠻夷猾夏寇賊姦宄汝作士

又皐陶謨曰若稽古皐陶曰允迪厥德謨明弼諧

史記夏紀曰帝禹立而舉皐陶薦之且授政焉而皐陶卒封皐陶之後於英六或在許而後舉益任之政

史記正義曰帝王紀云皐陶生於曲阜曲阜偃地故帝因之而以賜姓曰偃堯禪舜命之作士舜禪禹禹卽帝位以皐陶最賢薦之於天將有禪之意未及禪會皐陶卒括地志云咎繇墓在壽州安豐縣南一百三十里故六城東東都陂內大冢也

路史曰帝少昊取高陽氏之女曰修生大業大業取少典氏女曰華生繇繇爲虞士師封之于皐是曰皐陶皐當與咎同商有咎單讀爲舊非也皐陶有子三人長伯翳次仲甄次封偃

謠

路史曰謠國見潛夫論宜皐陶名之訛

偃

路史曰楚昭陽伐魏取鄆今許之鄆城有故城而蔡之褒信故鄆城乃漢之偃

英

史記陳杞世家曰皐陶之後或封英六楚穆王滅之無譜

索隱曰英六或作蓼六皆通據系本二國皆偃姓故左傳臧文

仲聞六與蓼滅曰皐陶庭堅不祀杜預云蓼與六皆咎繇後又齊徐伐英氏杜云英六皆皐陶後國名是有英英虞實未能詳或者英改號蓼

又曰英地闕不知所在以為英布是其後也

正義曰英蓋蓼也括地志云光州固始縣本春秋時蓼國偃姓皐陶之後也左傳云燹滅蓼太康地志云蓼國先在南陽故縣今豫州鄆縣界故胡城是後徙於此

春秋僖公十七年春齊人徐人伐英氏

張氏曰英氏皐陶後之封也為徐伐英氏桓公之興師未矣

汪氏曰桓公舍楚不討而加兵於厲與英氏虐區區之小國是縱豺狼而搏狐鼠也

庖言曰史記皐陶之後封英六春秋有英氏先儒以為即皐陶後也路史詳辯蓼非皐陶之後而又不以英氏為英不知何據或偶失之今直隸廬州府有英山縣

六

帝王世紀曰皐陶次子甄是為仲甄封於六

春秋文公五年秋楚人滅六

左傳六人叛楚即東夷秋楚成大心仲歸帥師滅六冬楚公子燹滅蓼臧文仲聞六與蓼滅曰皐陶庭堅不祀忽諸德之不建民之無援哀哉

史記索隱曰地理志云安國六縣咎繇後偃姓所封國

括地志曰故六城在壽州安豐縣南一百三十二里

皇覽曰臯陶冢在廬江六縣

北魏高允傳曰允以獄者人命所繫嘗歎曰臯陶至德也其後英
蓼先亡劉項之際英布黥而王經世雖久猶有刑之餘釁况凡人
能無咎乎

楊氏慎曰左傳臯陶庭堅不祀蓋設監戒之言如云若敖氏之鬼
不其餒而之比也後人遂謂臯陶真不祀而曼說者又言刑官無
後豈不謬哉按張平子思玄賦云咎繇邁而種德兮樹德懋於英
六註英六國名楚末乃滅枹朴子云秦乃伯益之後益卽臯陶子
也以是參考之臯陶何嘗無後乎

胡氏應麟曰史記臯陶卒禹封其後于英六而後舉益授之政
夫益爲臯陶子則臯陶之後卽益也何以封英六而後舉益乎
臯益五臣同列虞也益爲臯子史傳蔑聞不祀忽諸之語蓋春
秋時或其後中絕如宣孟之忠而無後之義非謂臯陶之身也
考英布封九江王都六乃項羽時嗣封者以英布自謂臯陶後
故都六以襲舊都非謂禹時所封英六二國秦世尚存楚末乃
滅也考布之會垓下史有以舒屠六之文故注云楚末乃滅然
布傳破籍後封布九江王復都于六高帝末年布反乃滅今謂
滅于楚末亦注之訛也至枹朴妄援尤不足辨而用修信之何
哉又史記秦紀云帝顓頊之裔大業復取少典之子曰女華生
大費索隱曰此卽秦趙之先伯益也據此則伯益之父大業而
裔嬴秦也謂大業爲臯陶則嬴秦卽英六耶用修欲以證臯陶
之多男不適以誣伯益之二父耶

陳心叔名疑曰路史云皐陶父大業取少典氏之女曰華生陶封於皐故稱皐陶帝王紀云皐陶生於偃故賜姓偃皐陶長子費是爲大費秦之祖也次子仲甄封於六秦紀云大業取女華生大費而正義卽以大業爲皐陶殆謬呂覽註云伯益皐陶之子亦謬胡氏應麟曰按以益爲皐陶子謬始曹大家訓列女傳云陶子生五歲而佐禹注陶子皐陶之子伯益也後葛稚川張守節皆本之羅泌能辨益非皐子而不知伯益之卽伯翳故又以大業爲皐陶父而大費爲皐陶子其說之舛訛抑又甚焉考史傳益翳爲一明甚至路史謂皐陶之後爲李氏本皐陶爲理官也斯說得之

卮言曰伯益非皐陶之子路史足以破前說矣伯益之卽爲伯翳諸說足以破路史矣詳在帝王世系篇可考也史記謂皐陶之後封于英六故思玄賦云然非謂英布之都六也春秋時有英氏六二國皆滅於楚故註云然非謂英布之六項楚後滅也胡氏妄引以闢楊氏則又謬矣夫有英六則皐陶不爲無後古者諸侯祀其太祖國滅則祀亾不祀之歎如虞曹亾而虞仲振鐸之祀忽諸之謂也豈謂其絕嗣乎高允遂以英蓼先亾爲治獄之應而謂英布有刑之餘釁後世遂有刑官無後之語嗚呼定國持平而于氏高門張湯執法而封侯累世況於上聖而德邁種哉英布之起不旋踵而滅此何足爲皐陶輕重而引以爲名高氏之失言也或者必以秦爲伯益之後而伯益爲皐陶子則前辯甚悉且皐陶偃姓也伯益嬴姓也豈父子而異姓乎據路史所考偃姓之國春秋時多

矣左傳所言或亦一時太息云爾若李氏之出於臯陶路史之說甚明皆足爲臯陶有後之證而不必妄指伯益之系以附臯陶也

州

左傳桓公十一年楚屈瑕將盟貳軫鄖人軍於蒲騷將與隨絞州蓼伐楚師莫敖患之鬬廉云云遂敗鄖師于蒲騷

國策莊辛說襄王曰君王左州侯右夏侯輦從

路史曰今荆南監利故華容古州也昔隋絞州蓼伐楚敗鄖者皆近楚小國莊辛言州侯者非淳于之州

卮言曰按左傳楚文王之時州與絞隨蓼伐楚至襄王時猶有州侯則州之爲國舊矣

絞

左傳桓公十二年楚伐絞軍其南門莫敖屈瑕曰絞小而輕輕則寡謀請無扞采樵者以誘之從之絞人獲三十人明日絞人爭出驅楚役徒於山中楚人坐其北門而覆諸山下大敗之爲城下之盟而還哀公二年春伐邾將伐絞邾人愛其土故賂以漵東及沂西之田而受盟

路史曰楚伐絞傳云絞小而輕是國也邾邑亦有絞在隨唐之南

貳

左傳楚屈瑕盟貳軫

詳前州條

軫

路史曰左氏傳記軫國在楚東南貳在隨南

鬲

路史曰郡國縣道記古鬲國偃姓臯陶後漢為縣北齊併入安德
今隸德州

鄆南陽屬縣

止

路史曰地在首陽之北故曰止陽

參

棐

路史曰棐鄭地文公十二年會鄭伯處一說即棐林今開封宛陵
有棐林鄉集韻棐漢侯國一作棐音肥在魏郡宜誤

阮

詩大雅曰密人不恭敢拒大邦侵阮徂共

張氏曰阮國地在涇川

路史曰阮偃姓國文王侵阮是矣春秋文公四年秦伐晉圍阮
新城蓋與元同而切為願也故說同阮然代之五阮關乃音通
而地異也

氏族略曰阮商諸侯國在岐渭之間

皖

路史曰皖伯爵輿地記偃姓臯陶後楚滅之漢為侯舒之懷寧有
皖故城皖公山皖伯廟宋州郡志云晉安於舊皖城置懷寧輿史
云夏姓非佑作皖音患

舒

春秋僖公三年徐人取舒

高郵孫氏曰舒者附庸之國服屬於楚徐人自楚取之使之屬

徐也取國不言滅舒之宗祀復存也

家氏曰魯頌曰荆舒是懲舒與荆比而爲中國患其來久矣徐人伐舒爲中國撓楚也十五年楚伐徐齊桓率諸侯之師救之是以知徐嘗受命於齊

左傳文公十二年夏楚令尹大孫伯卒成嘉爲令尹群舒叛楚夏子孔執舒子平及宗子遂圍巢

羅氏曰孔子作春秋凡并國邑在內皆曰取外而書取必其以討若本本有者也徐人取舒何也舒昔屬徐今屬魯而徐人取之也外取內邑不繫國故世以鄆闡鄆爲魯邑不知鄆闡鄆亦皆昔不屬而今屬鄆者文之昭也豈宋屬邪然罪之宋則見其今服宋故伐宋而取之知此則知舒之所屬矣括攷其地宜居

徐魯之間而非群舒哀公十四年有舒州者正乃齊地杜以舒爲羣舒江淮雜夷而徐取之爲夷蠻之自相并此尤繆矣預例以爲勝國不用大師曰取用大師曰滅抑又大妄夫成國重於附庸附庸重於都春秋必謹於此惟其罪有輕重淺深也今顧不然而反爲不道者記師行之難易邪衛侯滅邢可謂易矣而不書取公以楚師伐齊取穀用大師矣而不書滅不爲難易書亦明矣雖然秦趙莒李黃徐邽費解梁諸國其後盛矣而滅文仲以爲臯陶不祀此左氏之妄志謠斐參會阮酈舒止皆偃姓也而王符以爲嬴姓商出於潛夫之失攷且以舒庸舒龍舒鮑舒龔五也而杜佑以爲楚之五舒爲一唐史遂謂群舒一國五名勞乎今之記哉

厄言曰徐人取舒舒國屬徐矣其後又屬楚而復叛之至是執舒子平以圍巢則其國始滅矣按志今廬州府舒城縣古舒國也去巢縣僅二百里

舒蓼

左傳文公十四年楚莊王立子孔潘崇將襲群舒使公子燮與子儀守而伐舒蓼二子作亂城郢而使賊殺子孔不克而還二子以楚子出遂殺闞克及公子燮

春秋宣公八年秋楚人滅舒蓼

左傳楚為羣舒叛故伐舒蓼滅之楚子彊之及滑汭盟吳越而還

張氏曰杜預云舒蓼二國名按地譜上義陽之蓼文五年已滅於楚此卽如舒鳩舒庸蓋羣舒別種非二國也

路史曰舒蓼郡也唐武德中為廖州尋廢入壽盟會圖云在光州杜以為二國既非而通典更以為潮陽潮陽乃廖也因預之謬

舒庸

春秋成公十七年冬十二月楚人滅舒庸

左傳舒庸人以楚師之敗也道吳人圍巢伐駕圍釐虺遂恃吳而不設備楚公子橐帥師襲舒庸滅之

任公輔曰舒庸東夷偃姓之國地譜廬州城下舒城

薛氏曰舒庸舒之別種也詩曰荆舒是懲則荆舒之國皆非一種也春秋之始荆舒皆以名見舒庸舒蓼舒鳩之滅荆舒一於

楚矣

路史曰舒庸在舒城內與庸別

舒鳩

春秋襄公二十五年秋楚屈建帥師滅舒鳩

左傳襄公二十四年吳人爲楚舟師之役故召舒鳩人舒鳩人叛楚楚子師于荒浦使沈尹濤祁犁讓之舒鳩子敬逆二子而告無之且請受盟二子復命王欲伐之遽子曰不可乃還二十五年遽子卒屈建爲令尹舒鳩人卒叛楚令尹子木伐之及離城吳人救之子木遽以右師先擊吳師吳人大敗遂圍舒鳩舒鳩潰八月楚滅舒鳩

汪氏曰舒鳩偃姓子爵國

路史曰舒鳩故城在舒城內離城荒浦皆其也

舒龍

路史曰杜預云六西南有舒城又西南有龍舒今舒城西北龍縣故城去州三百而舒城懷寧皆有龍舒鄉大小龍山曰龍以別羣

舒

舒鮑

路史曰舒鮑世本云小國寰宇記舒鮑城在舒城西北龍舒水南小於諸城

舒龔

路史曰堯之龔丘東南有古龔丘城然與羣舒遠疑別國右偃姓國

李

路史曰伯翳少子恩成之伯世為理以命族至紂時理徵為冀肆
中吳伯弗合以死取契和氏逃難伊虛為李氏李理字通徐廣云
河內平臯有李城李坂今温縣城是昔李同却秦兵歿封其父李
侯即其地

庖言曰臯陶為士士即理今之理官也理與李通臯陶之後世為
李路史考之甚悉詳在本類帝王篇唐世章然羅氏以李為伯翳
少子恩成之伯則又不合亦詳前章今系於此

苦

路史曰理徵生仲師昌祖冢于苦生形德其曾孫碩宗因采焉康
命今毫之衛真漢苦縣隸淮陽國晉屬梁國後魏為谷陽唐為真

源有渦水瀨鄉祠老子生處

萊

路史曰碩宗五世孫曰乾字元果為周御史生耳是為老子邑干
苦之賴賴乃萊也故又曰老萊子

段干

路史曰老子生宗邑干段干初邑段後邑干因邑而氏其後有段
干木傳云蹇叔處干而干亾之秦而秦伯干國也而風俗通氏姓
乃以為姓段名干木唐百官表遂以為姓段而為干木大夫疎矣
郡國志衛縣南有干城詩出宿于干者今開封有邦溝段干木廟
而墓乃在汾之孝義東北二十五里

贏

晉

卷

一

史記秦紀曰大費佐舜調訓鳥獸是爲伯翳舜賜姓嬴

路史曰伯翳能馴鳥獸知其話言以服事虞夏始食于嬴爲嬴氏
暨功益弘帝乃錫之阜旂玄玉姚女而封之費是爲大費

羅氏自注曰嬴盈也翳能毓物庶物盈美而以爲封春秋時爲
齊邑襄公會齊侯處漢嬴縣屬太山郡後魏復置於萊蕪唐入
博城所謂嬴博宋萊蕪屬苑

又曰益翳二人書傳多以爲卽伯益故以嬴姓皐陶爲出高陽
而大廉若木爲伯益子者成都記伯益二子大曰大廉封鳥俗
氏小曰若木別爲費氏居南裔爲諸侯又九真守谷朗碑云出
自顛項益爲舜虞賜姓嬴氏至犀子封秦谷爲氏皆繆以益翳
聲近而職同爾

卮言曰路史之謬無如叙皐陶伯益之世系也但知伯益非皐陶
子而不知栢翳卽伯益也若以翳爲皐子則秦趙宜祖皐陶而皐
陶隱姓非嬴也嬴自是伯益之後同出少昊詳帝王門秦世章
費

竹書夏后啓二年齊侯伯益出就國六年伯益薨祠之

王氏筆叢曰益封費蓋舜禹之世非啓始封也史記以大費爲
伯翳名其誤由此

史記大費生子二人一曰大廉實鳥俗氏二曰若木實費氏其玄
孫曰費昌子孫或在中國或在夷狄費昌當夏桀之時去夏歸商
爲湯御以敗桀於鳴條

索隱曰以仲衍鳥身人言故爲鳥俗氏若木以王父字爲費氏

也殷紂時有費仲卽費昌之後

竹書夏后帝癸二十九年費伯昌出奔商

路史曰費翳之封音沸費州費水之地與魯費河南費異

盈

路史曰盈羸之枝與熊郁皆為周公所郊一作鄧姓也或云卽羸者非

蕭

路史曰伯翳生大廉若木恩成大廉之後有孟虧仲衍孟虧能帥翳者胙土于蕭今徐之蕭漢故縣屬沛北征記云城週十四里南臨沔水

梁

左傳桓公九年秋虢仲芮伯梁伯荀侯賈伯伐曲沃

僖公十八年梁伯益其國而不能實也命曰新里秦取之遂城而居之

史記秦德公元年梁伯芮伯來朝成公元年梁伯芮伯來朝繆公二十年秦滅梁芮

索隱曰梁羸姓國在馮翊夏陽

春秋僖公十九年冬梁亡

左傳梁亡不書其主自取之也初梁伯好土功亟城而弗處民罷而弗堪則曰某寇將至乃溝公官曰秦將襲我民懼而潰秦遂取梁

公羊傳此未有伐者其言梁亡何自亡也其自亡奈何魚爛而

亾也

張氏曰梁嬴姓伯爵伯翳之後春秋變法以書諸侯自取滅亡者有二晉人執虞公猶言兵已加於頸而不自知也梁亡言國自亡而不之覺也

路史曰仲衍裔孫曰蜚廉生葦暨季勝季勝後造父封趙詳前章葦

五世曰非子是為秦仲周孝王封之秦谷使復嬴氏詳前帝系章而復

錄其少子康使有夏陽為梁伯秦德公三年梁伯來朝索隱曰嬴

姓是矣魯僖公十九年秦取梁惠文君更名夏陽今同之韓城有

少梁故城文公十年晉伐秦取少梁是也

庖言曰按一統志今陝西郃陽縣古梁國

西梁

路史曰高陽氏有才子八人二曰伯益為唐澤虞是為百虫將軍

佐禹治水封之于梁是為西梁地理風俗傳扶柳西北五十有梁

城故漢西梁縣西梁故城在今冀之南宮堂陽鎮鎮之東鹿南六

十里縣道記西梁故城二三里

庖言曰路史以伯益伯翳為二人故云伯益封梁栢翳封費按益

即翳封費故曰大費其封梁者自是益之後代系益于梁猶系湯

于殷非益始封梁也西梁者又梁之析如北虢西楚耳路史亦誤

南梁

路史曰南梁大敖梁之析也

敖

路史曰梁析傳謂顓頊大敖之後詩云薄狩于敖是也今沂之新

泰東十一故敖國有敖山

鍾離

路史曰梁伯之後采鍾離者今沂之承有鍾離氏春秋晉與諸侯會吳于鍾離是也應劭曰鍾離子國在九江蓋其後徙于此吳滅之光武時為侯國今濠之治東六里鍾離故城也而宜咎之所城則楚地矣

卮言曰春秋成公十五年冬叔孫僑如會晉士燮會吳于鍾離杜氏云鍾離楚邑淮南縣是時鍾離已入楚矣按志今直隸鳳陽府古鍾離地

連離

路史曰梁之後食于運者京相璠云廩丘東八十有運城廩丘隨併入鄆城今隸濟晉人執季文子還待于鄆即此

奄

書多士篇曰朕來自奄至于宗周

書序曰成王東伐淮夷遂踐奄

孔氏曰踐滅也成王即政淮夷奄國又叛王親伐之遂滅奄而徙之

鄭玄曰奄國在淮夷之北

史記正義曰奄音於險反括地志云奄泗水徐城縣北三十里古徐國即淮夷也兗州曲阜縣奄至即奄國之地又成王既踐奄將遷其君於蒲姑周公告召公作將蒲姑

孔氏曰蒲姑齊地徙近中國後化之

史記正義曰括地志云薄姑故城在青州博昌縣東北六十里薄姑氏殷諸侯封於此周滅之

呂氏曰淮夷與奄成王時蓋皆冉叛大誥東征淮夷叛矣此序復云多士言昔遷來自奄矣此序又云可見也

李氏杞曰貴州千乘縣有薄姑城遷奄君臣於薄姑遷奄民於魯祀鮑所謂因商之民而命伯禽也

竹書成王二年奄人及淮夷入于邶以叛三年王師滅殷遂伐奄滅蒲姑四年王師伐淮夷遂入奄五年春正月王在奄遷其君子蒲姑夏五月王至自奄

孟子曰周公相成王誅紂伐奄三年討其君

左傳景王使詹桓伯辭於晉曰武王克商蒲姑商奄吾東土也

路史曰梁之後自運采掩卽奄郟也充之仙源故曲阜有奄城奄里郡國志曰奄城古奄國唐韻曰奄國名祝佗云因商奄之民以命伯禽者按尚書將蒲姑成王政俱云踐奄而周官言威淮夷大誥言淮夷叛多士乃言朕來自奄知奄近淮夷也古之弁中張茂先云史記出魯弁中左傳齊崔杼之難間丘嬰行出弁中杜預疑爲太山萊蕪西壻口谷

尋

路史曰今尋陽字一從水梁之後尋衙汪良菟裘不羹東灌東閭修魚樗里密如高陵附庸氏也

衙

路史曰今同之白水有彭衙故城

汪

路史曰今同之白水有汪城在臨晉東

良

路史曰今淮陽有古良城史作將梁

菟裘

不羹

左傳昭公十一年楚共王城陳蔡不羹明年伐徐謂子革曰今我
大城陳蔡不羹賦皆千乘諸侯其畏我乎對曰是四國者專足畏
也又加之以楚敢不畏君王哉

羅氏曰春秋時有二不羹襄城爲西不羹今龍興之南有古不羹
戒定陵爲東不羹今入潁川舞陽縣子革云四國皆足畏謂陳蔡
二不羹也

鍼

路史曰非子之支孫曰秦鍼奔晉封裴中曰裴君傳謂平公封顓
帝孫鍼爲裴君故表又以爲顓帝風姓之後安矣六世陵遷解爲

解君

裴

路史曰裴豈也河東聞喜裴鄉是

解

路史曰解今洛西南大解城也又有小解非河東之解

徐

通考曰徐嬴姓子爵始封於夏歷殷周國在下邳僅縣

詳後各節

書序魯侯伯禽宅曲阜徐夷並興東郊不開作費誓

書費誓曰公曰嗟人無譁聽命徂茲淮夷徐戎並興善穀乃甲冑敵乃干無敢不弔

漢孔氏曰徐戎淮夷並起寇魯伯禽為方伯帥諸侯之師以征歎而救之

蘇氏曰淮夷叛已久矣及伯禽就國又脅徐戎並起故曰徂茲淮夷徐戎並

張氏沂曰孔氏引費誓成王東伐淮夷魯伐徐戎然則魯侯乃佐王征討也

呂氏曰伯禽撫封於魯夷戎妄意其未更事且乘其新造之際而伯禽應之整暇有序

竹書成王二年奄人徐人及淮夷入于邳以叛又穆王六年春徐子誕來朝錫命為伯

禮記檀弓篇曰邾婁考公之喪徐君使容居來弔含曰寡君使容居坐含進侯玉其使容居以含有司曰諸侯之來辱敝邑者易則易于則于易于雜者未之有也容居對曰容居聞之事君不敢忘其君亦不敢遺其祖昔我先君駒王西討濟於河無所不用斯言也

言用稱王之言也

容居魯人也不敢忘其祖

史記秦紀曰穆王西巡狩樂而亡歸徐偃王作亂造父為穆王御長驅歸周一日千里以救亂

索隱曰地里志云臨淮有徐縣云故徐國尸子曰徐偃王有筋

而無骨駟謂號偃由此

正義曰括地志云大徐城在泗州徐城縣北三十里古徐國也
又云徐城在越州鄞縣東南入海二百里夏侯志云翁州上有
徐偃王城傳云昔周穆王巡狩諸侯共尊偃王穆王自還討之
或云命楚王帥師伐之偃王乃於此處立城以終

又曰古史考云徐偃王與楚文王同時去周穆王三百餘歲矣
且王者行有周衛安得救亂而長驅日行千里乎此事非實

淮南記論訓曰徐偃王被服慈惠身行仁義陸地之朝者三十二
國然而身死國亡子孫無類此達於治亂之機而未知全性之具
者知仁義而不知時也

又人間訓曰昔徐偃王好行仁義陸地之朝者三十二國王孫厲
謂楚莊王曰王不伐徐必反朝徐王曰偃王有道之君也好行仁
義不可伐王孫厲曰臣聞之大之與小強之與弱也猶石之投卵
虎之嚼豚又何疑焉且夫爲文而不能達其德爲武而不能任其
力亂莫大焉楚王曰善乃舉兵而伐徐遂滅之此仁義而不知世
變者也

韓非五蠹篇曰古者太王處豐鎬之間地方百里行仁義而懷西
戎遂王天下徐偃王處漢東地方五百里行仁義割地而朝者三
十有六國荆文王恐其害已也舉兵伐徐遂滅之故文王行仁義
而王天下偃王行仁義而喪其國是仁義用於古不用於今也

博物志曰徐君宮人有娠而生卵以爲不祥棄於水濱孤獨母有
火鵠蒼銜所棄卵以歸覆煖之乃成小兒生偃故宮人聞之更取

養之及長襲爲徐君後鵠蒼臨死生角而九尾化爲黃龍鵠蒼或名后蒼

穆傳註曰穆王時徐夷作亂伐宗周穆王畏其方熾乃分東方諸侯命徐子主之徐子處潢池東地方五百里行仁義通溝陳蔡之間欲舟行上國得朱弓赤矢以爲天瑞乃稱偃王

韓子衢州徐偃王廟碑曰徐與秦俱出柏翳爲嬴姓國於夏殷周世咸有大功秦處西偏專用武勝遭世衰無明天子遂虎吞諸國爲雄諸國旣皆入秦爲臣屬秦無所取利上下相賊害卒償其國而沈其宗徐處得地中文德爲治及偃王誕當國益除去刑爭未事凡所以君國子民待四方一出於仁義當此之時周天子穆王無道意不在天下好道士說得八龍騎之西遊同王母宴于瑤池

之上歌謳忘歸四方諸侯之爭辯者無所質正咸賓祭于徐贄王帛生死之物于徐之庭者三十六國得朱弓赤矢之瑞穆王聞之恐遂稱受命命造父御長驅而歸與楚連謀伐徐徐不忍鬪其民北走彭城武源山下百姓隨而從之萬有餘家偃王死民號其山爲徐山鑿石爲室以祠偃王偃王雖走死失國民戴其祠爲君如初駒王章禹祖孫相望自秦至今徐氏十望其九皆本於偃王而秦後迄茲無聞家天於柏翳之緒非偏有厚薄施仁與暴之報自然異也或曰偃王之逃戰不之彭城之越城之隅棄玉几研于會稽之水或曰徐子章羽旣執于吳徐之公族子弟散之徐揚二州間卽其居立先王廟云

辭曰秦傑以顛徐由遜邈秦鬼久饑徐有廟存婉婉偃王惟道之

及國詩系 卷十
三十一
耽以國易仁爲笑于頑自初擅命其實幾姓歷短詈長有不償亾
課其利害孰與王當姑蔑之墟太末之里誰思王恩立廟以祀王
之聞孫世世多有

臨川吳氏曰穆王之時徐僭稱王帥九夷以伐宗周徐國雖小但
春秋之前已僭王猶夏矣

卮言曰徐偃王事不見經傳昌黎特採世所傳小說撰次本末然
偃王以人臣而受諸侯朝何心哉卽有澤於民無足多也偃王又
曰駒王蓋本禮記徐容居曰昔我先君駒王云則徐之僭王罪先
於吳楚矣昌黎特爲其後人乃曲與回護如此

路史曰費仲事紂其立于淮者爲嬴氏夏世有王命以徐伯王淮
夷三十二世君偃當周穆王時假仁義而三十六國賓服穆王遣
楚師襲破殺之其子宗北走彭城武原山萬衆從之號曰徐山
竹書穆王三十五年荆人入徐毛伯遷敗荆人于沛

又宣王六年王帥師伐徐戎次于淮王歸自伐徐錫召穆公命
詩大雅常武二章曰王謂尹氏命程伯休父左右陳行戒我師旅
率彼淮浦省此徐土

三章曰赫赫業業有嚴天子王舒保作匪紹匪遊徐方繹騷震驚
徐方如雷如霆

集註夷厲以來周室衰弱至是而天子自將以征不庭其師始
出不疾不徐而徐方之人皆已震動

五章曰王旅嘽嘽如飛如翰不測不克濯征徐國

六章曰王猶允塞徐方旣來徐方旣同天子之功四方旣平徐方

來庭徐方不回王曰還歸

曹氏曰宣王北伐獫狁西征羗戎南威蠻荆獨徐方未服今來朝於王庭則四方既平矣於是王命凱旋而行飲至策勲之禮焉

春秋莊公二十六年秋公會宋人齊人伐徐

杜氏曰徐國在下邳鄆縣

胡傳按書伯禽嘗征徐戎則戎在徐州之域爲魯患舊矣是年春公伐戎秋又伐徐者必戎與徐合兵表裏爲魯國之患也故雖齊宋將甲師少而公獨親行

僖公三年夏五月徐人取舒

廬陵李氏曰按徐偃始稱王故春秋亦狄之楚敗徐徐伐莒是

也惟取舒伐英氏得稱人以附齊也昭五年從楚伐吳亦稱人者楚師有名也昭三十年滅於吳又曰外滅國書取者惟此左氏公羊皆以爲易趙氏以爲不絕其祀也夫用兵雖有難易而滅人之罪無重輕何得以易而滅其滅罪乎以爲不絕其祀則書降書遷足矣以爲舒自取滅亾則書潰書亾足矣何得稱取稱取者與魯兵書滅曰取同文蓋徐始見經而得書人始滅國而得書取是必未滅之辭故先儒林氏以爲舒者楚之黨徐人取舒爲齊桓通伐楚之徑也春秋以其效順於中國也故書人書取此說疑得之

十五年春王正月楚人伐徐三月公孫敖帥師及諸侯之大夫救

徐

左傳楚人伐徐徐卽諸夏故也齊侯及諸侯盟于牡丘尋葵丘之盟且救徐也

臨川吳氏曰徐夷也首僭王楚亦夷也次僭王徐楚同惡者也
因齊桓之合諸侯匡天下徐亦革面而即諸夏乃為楚所伐故
諸侯會盟于牡丘遂次于匡諸侯之大夫帥師以救之

冬楚人敗徐于婁林

杜氏曰婁林徐地下邳僮縣東南有婁亭

陳氏曰楚伐徐齊桓合八國之眾盟于牡丘次于匡以救徐為
之伐厲而徐卒敗於楚人不數年宋楚爭盟執宋公以是為盟
主病矣

劉氏曰徐伯益之後其上世有元德顯功通於中室與中國冠
帶之君無以異徐始稱王王非諸侯所當稱也故夷狄之

汪氏曰徐始見經及取舒伐英氏伐吳皆稱人會申楚人執之

奔楚皆稱子獨此敗與伐莒皆舉號內不使與中國同外不使
與中國等也

十七年春齊人徐人伐英氏

左傳以報
婁林之役

文公七年冬徐伐莒

汪氏曰徐僭王故春秋比諸夷狄取舒伐英氏稱人以其能附
中國也會申稱子則在諸侯皆狄耳

左傳成公七年吳伐巢伐徐楚子重奔命救巢救徐

左傳襄公二十九年吳使季札聘於魯北過徐君徐君好季札劍
弗敢言季札心知之為使上國未獻還至徐徐君已死於是乃解
其寶劍繫之徐君冢樹而去

索隱曰括地志云徐君廟在泗州徐城縣西南一里即季子掛

劍之徐君也

卮言曰此徐君在章羽之前凡三十餘年矣

昭公四年夏楚子諸侯徐子淮夷會于申楚人執徐子

左傳楚子合諸侯于申徐子吳出也以爲貳焉故執諸申

胡傳申之會楚子爲主而不殊淮夷是在會之諸侯皆狄也

昭公五年冬楚子蔡侯陳侯許男頓子沈子徐人越人伐吳

胡傳吳以朱方處齊慶封崇惡也楚執慶封殺之討罪也吳復

報之狄道也楚於是以前諸侯伐吳則比吳爲善故從之者徐越

皆稱人

左傳昭公六年徐儀楚徐大賢名聘于楚楚子執之逃歸懼其叛也

使遽洩伐徐敗楚師于房鍾

十二年冬十月楚子伐徐

左傳楚子狩于州來次于潁尾使湯侯潘子司馬督帥師圍徐

以懼吳楚子次于乾溪以爲之援

廬陵李氏曰僖十五年書楚人伐徐敗徐之後徐世從楚至是

再伐則以吳故也

十六年春齊侯伐徐

左傳二月丙申齊師至于蒲隧徐人行成徐子及鄰人會齊侯

盟于蒲隧賂以甲父之鼎叔孫昭子曰諸侯之無伯害哉

家氏曰徐之封在齊南鄙桓公之霸楚成伐徐桓公親率諸侯

救之非但爲徐計亦自爲齊計今齊景爭晉霸乃伐徐以爲左

右望之計視桓公之保徐有愧多矣

汪氏曰楚虔之立徐屢從楚伐吳昭十二年以爲貳於吳而圍之蓋徐實楚之與國也此年盟蒲隧而遂與齊踰十五年吳卒滅徐則甲父之鼎固不足以保徐之社稷也

三十年冬十二月吳滅徐徐子章羽奔楚

左傳吳子執鍾吾子遂伐徐防山以水之己卯滅徐徐子章羽斷其髮攜其夫人以逆吳子吳子唁而送之使其邇臣從之遂奔楚楚沈尹戌帥師救徐弗及遂滅夷使徐子處之

常山劉氏曰齊滅譚楚滅弦狄滅溫君奔皆不名者強暴加於小弱力不能勝而奔義未絕也請於天子方伯則理可伸而國可復豈可遽絕之哉章羽旣已服矣而復奔楚則旣降矣安有興復之志哉故名之以著其絕也

陳氏曰奔非其罪莫甚於被兵者也雖不死社稷猶不名也其名徐子臣吳而後奔也滅國有二辭以歸臣之之辭也奔猶弗臣之之辭也不言歸若奔死之之辭也是故奔者不必名以歸而後名之徐子不名則疑於譚子弦子溫子矣

通考曰先儒林少穎言周自文武興於西土而化行於南故西夷最先服而東夷之服爲最後是以武王牧野之戰方與商師決勝負於行陣之間而西南夷之邦所謂庸蜀羌髡微盧彭濮者已皆作使而成王之卽政天下已太平矣東夷之徐奄猶興兵以叛也愚按徐雖柏翳之後有國已久而俗流於夷周初一叛於二監流言之時再叛於伯禽撫封之日周公魯公僅能定之至穆王稍有荒縱遠狩之失而偃王者遽爾僭號侈然有朝

諸侯有天下之意洎厲王無道宣王撥亂之始而繹騷於南國者又徐也然則徐於西周之時蓋常常稱亂於東南及東遷之後徐始微弱而東南之鳴張僭竊北向以爭諸侯者荆楚吳越相繼興矣其後徐益以弱服屬於吳楚之間而卒不得免焉然吳楚倔強於東周衰微之後而徐倔強於西周鼎盛之時則其初非弱國也

路史曰今徐城縣在泗之臨淮縣北三十里有故徐城號大徐城周十一里中有偃王廟徐君墓去徐州僅五百

卮言曰古之以州名國者惟荆與徐國而包州其爲大國可知詩書言徐方徐戎夷之也春秋書徐人徐子進也左傳昭公三十年吳滅徐哀公十四年陳恒弑簡公于舒州史記以爲徐州是徐地

入于齊也

取慮

路史曰取慮徐之分漢屬臨淮故下邳西南有取慮故城

淮夷

路史曰淮夷世本曰羸姓然淮夷非一成王所伐其一也

書序武王崩三監及淮夷叛周公相成王將黜殷作大誥成王東伐淮夷遂踐奄作成王政

唐孔氏曰周公攝政之初奄與淮夷從管蔡作亂周公征而定之成王卽政淮與奄又叛成王親往征之成王卽政始封伯禽費誓之稱淮夷徐戎並與魯侯征之王伐淮夷魯伐徐戎是同時討伐知成王卽政之年復叛也

詩大雅江漢首章曰江漢浮浮武夫滔滔匪安匪遊淮夷來求
三章曰江漢之滸王命召虎式辟四方徹我疆土匪攻匪棘王國
來極于疆于理至于南海

孔氏曰宣王命召穆公伐淮夷當在淮南魯公伐淮夷應在淮
北

永嘉陳氏曰淮夷地不一徐州有夷則在淮北者也揚州有夷
則在淮南者也江漢常武二篇同言淮夷以地理考之曰江漢
之滸者是淮南之夷者也若在淮北則江漢非所由入之路也
曰率彼淮鋪省此徐土者是淮北之夷也若在淮南則徐土非
聯接之地矣

東萊呂氏曰江漢合流之處在今漢陽軍之大別山下但去淮
夷絕遠或者會江漢之師以伐之歟

魯僖公時

詩魯頌曰明明魯侯克明其德既作泮宮淮夷攸服

七章曰角弓其觫束矢其搜戎車孔博徒御無數既克淮夷孔淑
不逆式固爾猶淮夷卒獲八章曰翩彼飛鴉集于泮林食我桑椹
懷我好音憬彼淮夷來獻其琛元龜象齒大賂南金

孔氏曰禹貢徐州淮夷蠙珠暨魚則淮夷其土不出龜象其國
不屬荆揚而獻龜象南金者非謂淮夷之地出此物也

安成劉氏曰朱子以克服淮夷為頌禱之詞事無所考以愚考
之僖公十二年嘗從齊桓會于鹹為淮夷之病杞十六年嘗從齊
桓會于淮為淮夷之病鄆矣詩詞過實要當為頌禱之溢詞也

春秋僖公十三年公會齊侯宋公陳侯衛侯鄭伯許男曹伯于鹹
左傳會于鹹淮夷病杞故且謀王室也

十六年冬十二月公會齊侯宋公陳侯衛侯鄭伯許男邢侯曹伯
于淮

杜氏曰淮臨淮郡左右後漢下邳國

師氏曰淮夷嘗病杞而齊侯城緣陵以復杞今會諸侯于淮得
非謀淮夷以杜其後來耶

汪氏曰桓公安攘之志至會淮而愈怠矣却淮夷而不力城鄆
而不果且會淮之前楚滅黃而不能恤狄侵衛而不能遏宜淮
夷之微亦肆其暴抑有所窺而動也或謂桓公以諸侯伐淮夷
魯信有功故魯頌稱既克淮夷而春秋不紀其事蓋削之也夫

詩人頌禱其君而願其有是功如曰居常與許復周公之宇云
耳使果有伐淮夷之功安得不以伐莒之例而時書于經耶

昭公四年夏楚子蔡侯陳侯諸侯宋世子佐淮夷會于申

胡傳申之會楚子爲主而不殊淮夷是在會之諸侯皆狄也
廬陵李氏曰胡氏不殊淮夷之說本之何休但何休以爲楚子
主會盟得義以誅慶封故君子不殊其類所以順楚而病中國
其不殊之義與胡氏異矣

秋七月楚子蔡侯陳侯許男頓子胡子沈子淮夷伐吳

卮言曰淮夷自是不見於經傳

江

春秋僖公二年秋九月齊侯宋公江人黃人盟于貫

公羊傳江人黃人者何遠國之辭也大國言齊宋遠國言江黃則以其餘爲莫敢不至也

張氏曰齊桓謀楚先服此二國皆迫近楚之境言所以遠交而孤楚之勢此桓公服楚之規模也

三年秋齊侯宋公江人黃人會于陽穀

四年春公會齊侯諸侯伐楚楚屈完來盟于師秋及江人黃人伐陳

臨川吳氏曰時江黃之師在其國伐楚之後未嘗勞之且以其國近于陳故令伐陳也必使齊人及之者江黃遠國不可無魯主兵也

文公三年秋楚人圍江冬十二月晉陽處父帥師伐楚以救江

左傳晉以江故告于周王叔桓公晉陽處父伐楚以救江門于

方城遇息公子朱而還

臨川吳氏曰自齊桓之霸江黃以近楚之國而從齊故楚憾之之深前旣滅黃矣而未加兵於江者蓋江猶能守其國也故至今年有圍江之師處父畏楚之強不敢徑趨江之城下乃揚言伐楚以救江門于方一見息公之來卽避之而返其怯明矣

四年秋楚人滅江

左傳楚人滅江秦伯爲之降服出次不舉過數大夫諫公曰同盟滅雖不能救敢自矜乎吾自懼也君子曰詩云惟彼二國其致不獲惟此四國爰究爰度其秦穆之謂矣

汪氏曰江黃二國之滅皆不書以其君歸亦不書其君奔者蓋君臣同力效死以守而待中國之救也故滅不書伐而更則書

伐江則書圍齊不救黃其罪可知晉雖書救江而所以救之者非其道與不救無以異也

杜氏曰江國在汝南安陽縣

路史曰江嬴姓國晉志汝南安陽江亭也今在信陽縣之東南剖息之西有安陽故城

卮言曰按志今河南確山縣

黃

左傳桓公八年楚子合諸侯于沈鹿黃隨不會使遠章讓黃

莊公十九年楚子伐黃敗黃師于踣陵還及湫而卒

春秋僖公十一年冬楚人伐黃十二年夏楚人滅黃

左傳黃人恃諸侯之睦於齊也不共楚職曰自郢及我九百里

焉能害我夏楚滅黃

穀梁傳貫之盟管仲曰江黃遠齊而近楚楚爲利之國也若伐而不能救則無以宗諸侯矣桓公不聽遂與之盟管仲死楚伐江滅黃桓公不能救故君子閔之也

杜氏曰黃國在汝南弋陽縣

卮言曰按志今河南光州古黃

耿

路史曰都城記云耿羸氏國辯誤以爲皮氏河中龍門縣十二故耿城晉獻公滅之以賜趙夙遂曰趙今晉之趙城

弦

春秋僖公八年秋八月楚人滅弦弦子奔黃

左傳曰楚鬪穀於菟滅弦弦子奔黃於是江黃道相方睦於齊皆弦姻也弦子恃之而不事楚又不設備故亡

路史曰弦嬴姓國晉志弦在西陽西陽今光山縣故城故歐陽志以光山為故弦國今光之仙居東十里弦亭也武德三年為弦州

茲

路史曰茲嬴姓國杜預云姑幕有茲城姑幕後齊併入東莞今高

密有故城九城志姑幕城在密然太原亦有茲氏城

蒲

路史曰晉志云隰之蒲子今濕川縣北四十五故蒲城晉重耳居

與衛蒲別

郟

卮言曰按志今南直隸海州古郟子國

邲

左傳初楚文王娶于邲曰邲夫人

路史曰邲子邲夫人國也世族譜云嬴姓

譚

春秋莊公十年冬十月齊師滅譚譚子奔莒

左傳齊侯之出也過譚譚不禮焉及其入也諸侯皆賀譚又不

至冬齊師滅譚譚無禮也

張氏曰齊桓方有志為政於天下非特不能與滅繼絕而以私

覆滅小國其罪大矣譚子國滅不名蓋無罪也

路史曰譚嬴姓國杜預云濟南東平陸西南有古譚城賈平云今

齊州東平陵鎮也今齊之歷城唐武德中爲譚州東南十里有故城一作鄆與郟異史記齊世家作滅郟故世以譚郟爲一而徐鉉以作譚爲非皆誤

卮言曰詩衛風碩人叙衛莊公夫人莊姜世類之貴也其曰譚公維私卽春秋之譚子史記齊世家桓公二年滅郟按襄昭時郟子朝魯郟固未滅也安得指譚爲郟又周紀襄王十六年王緇翟后翟人來誅殺譚伯按此時譚已滅于齊矣安得指原爲譚史記之誤

郟

路史曰郟嬴姓國太原郟縣以郟數名自漢不改其地甚廣金坡遺事繫八國蓋以郟奚邑爾

葛

路史曰葛魯附庸齊昭公毋葛嬴國河內修武有葛伯城

巴

路史曰巴嬴姓國左傳巴師侵鄭是巴瀘二州境與太昊後異

卮言曰路史風嬴姬姓皆有巴國而地同亦如蜀國今並存之而詳於雜國篇

時

路史曰時嬴姓國博昌有時水春秋之乾時杜預云旱則涸故曰

乾時

白

路史曰本嬴姓舊國今蔡之襄信西南白亭是楚平王滅之以

封子建之子勝

寘

路史曰寘史記作冥云嬴後有白寘氏則以白冥為一也冥在陝

復

路史曰今之復州春秋以來楚地

穀

麋

路史曰江黃以下十八國皆嬴姓也

學海書影卷二十九終



